

L. S E C T A N I
Q. F I L.

DE T O T A

G R A E C U L O R U M

H U J U S A E T A T I S

L I T E R A T U R A

A D

G A J U M S A L M O R I U M ,
S E R M O N E S Q U A T U O R .

*ACCESSERE AD EORUM DEFENSIONEM
QUINTUS ET SEXTUS.*

POST EDITIONEM HAGÆ - COMITUM
SEXTAM

E D I T I O P R I M A .

Augustæ Vind. & Oeniponti.

Apud JOSEPHUM WOLFF,

1 7 6 4 .



EDITOR LECTORI.

P*rodierant haud ita pridem Genevae quatuor L. Sectani Q. Filii Sermones de tota Graeculorum hujus aetatis Literatura, in eos tantum, ut indicat ipse titulus, ab auctore contorti, qui, cum doctrina parum, aut nihil valeant, multum sibi arrogant in Re Literaria, & vano exquisitioris eruditionis obtentu imponere indoctioribus student. Res erat admodum innoxia, & quae nulli displicere deberet, nisi ei, qui sponte vellet de se confiteri. Inveni nullo minus Literati tres, aut ad summum quatuor, qui irrogatam sibi injuriam credidere; quasi in eos unice convenirent, quas dixi, Satyrae, nec praeter ipsos alii uspiam Graeculi invenirentur. Eo prorupit hominum impudentia, ut ad arma palam conclamaverint, & L. Sectano, veluti hosti publico politioris Literaturae,*

A 2

*raturae, bellum internecinum indixerint. Fa-
tuus quaerebatur, qui prior vellet in aciem pro-
dire & unum se pro communi Graeculorum digni-
tate opponere. Nec diu quaesitus frustra. Ex-
titit Cesellius nescio quis, qui contra Latinas sa-
tyras Italicos aliquot versiculos, eosque ineptissi-
mos, foedissimosque deprompsit. Qua in re illud
etiam peccavit enormiter, quod vana suspicione
auctus, sub L. Seſtani nomine duos latere existi-
mavit egregios Jesuitas, Pompejum Venturium,
& Hieronymum Lagomarsinum, in eosque tan-
quam criminis manifesti convictos & in ipsam So-
cietatem nihil tale promeritam, quot quot potuit
convicia furentis more jactavit. Pupugit ea res
non mediocriter L. Seſtanum, qui videret in ma-
lam partem accepta, quae ipse optima mente, &
sine ulla animi perversitate conscripserat. Doluit
praeterea praecclarissimis Viris fraudi verti, quae
ipsis ne scientibus quidem facta essent.*

Quare

Quare, ut facti rationem redderet, simul ut innocentium famam, si quid imminuta apud vulgus esset, redintegraret, addidit prioribus Sermonibus quintum, quo mentem suam prolixius explicans, nullum relinquebat dubitandi locum, quin de sola Graeculorum natione vellet intelligi. Verum, ut difficile est, ambitiosis praesertim, & de se magnifice sentientibus, conceptam semel opinionem deponere, id quoque illi, quod debuerat non modo crimen omne, sed etiam criminis suspicionem diluere, in deteriorem partem interpretantur; illa etiam re, credo, efferati majorem in modum, quod viderent L. Sectanum miro ubique plausu, & secundissima approbatione ab Eruditis exceptum. Itaque haud multo post ecce tibi, sub Thymoieontis nomine, probrosissima in lucem educitur Menippea, Carmen male Latinum, in quo maledicta omnia congesta sunt, aut vulgata haecenus, aut deinceps vulganda adversus Jesuitas: Perinde quasi id ageretur, quales Je-

6 EDITOR LECTORI.

*suitae existimandi sint, cum Sectani Sermonibus erat respondendum. Quid ad haec L. Sectanus? Sextum denique Sermonem deproperat, quo controversiae totius initia, progressusque poëtice exequutus, satis ostendit nolle se amplius cum hujusmodi furiosis rem habere, qui defensionis suae praesidium omne injurgiis, & contumeliis puero-
rum more collocaverint. Haec ego Te, amice Lector, praemonitum volui, ut, quae lecturus es, facilius percipias: Nec dubito, quin boni sis consulturus, quod hos ego Sermones laudatissimos simul conjungere, ac denuo publici juris facere constituerim; cum praesertim priora exemplaria jam nulla fere sint, & mirifice ab omnibus expectantur. Vale.*

SERMO



SERMO PRIMUS.

NON, qualem me, Salmori, paullo ante solebas
Adfari, timidusque verecundusque, sed audax,
Arduus, & Duce Ventorum imperiosior adsum.
Heus Tu, discede ad laevam, pronusque, rotundam
Tonsuram ut videam (a), dic nobis rite salutem:
Nec nimis adcede, & paullum sta gibbus, & ambas
Demitte auriculas, verbisque precantibus uti
Adsuesce, a veteri si quidquam poscis amico.
Miraris? Rides? atqui non me malus aura
Jupiter adflavit furiali, & sulphure diro:
Nec lunae ad radium mens est emota, nec illuc
Migravit (quod ego scierim) pars optima nostri,
Quo res amissae coeunt (b); ubi plurima quondam
Inventa est liquidi custos ampulla cerebri.
Et valui, & valeo. Quod si haec insania dici

Debet,

(a) Forte is, ad quem scribit, Sacerdos est, & summum
verticem tonsum habet Sacerdotum more.

(b) Notum Ludovici Ariostii commentum de rebus amissis
in lunam translatis.

Debet , amabilior nulla est Sapientia : malo
 Desipere hoc pacto : fias utcumque beatus ,
 Oprandum ut fias , sunt & deliria tanti.
 Quid causæ est igitur , cur sim mutatus ab illo ,
 Qui tecum nupér lusus miscere solebam
 Innocuos , tecum & labentes condere soles ,
 Tecum aegri Curas animi partirier ? Unde
 Tam cita majestas ? Unde haec frons plena minarum ,
 Atque supercillii nimbus ? Fuit ille ferendus
 Ufus amicitiae , dum par fortuna sinebat.
 At nunc distamus nimium : piget usque deorsum
 Despicere , & pumilum vix internoscere amicum.
 pyramis (c) aërio quae vertice celsa minatur
 Flaminiae , & dominam despectat desuper Urbem ,
 Num metam exilem dignatur , mole pusilla
 Agrippae ingentes quae sistitur ante Columnas ,
 Et tenuem praebebet betas vendentibus umbram ;
 Sint quamquam exsectae scopulis communibus ambae ,
 Cognataeque iisdem Pharaonibus ? En etiam Tu
 Repis humi , veluti limax , viridisque lacerta ,
 Rhetorem agens vernam : manibus Cicerunculus haeret
 Semper , & adtritrus nocturno , idemque diurno

Polli-

(c) Sunt duae Pyramides , quarum altera procerrima
 ad portam Flaminiam sita est , altera perexigua in foro Agrip-
 pae.

Pollice Virgilius ; nec quidquam grande minaris
 Praeterea , aut istis emergere sordibus audes :
 Illa contentus sparta , quod pendeat ore
 Grex cirratorum (d), Musasque procare Sorores ;
 Te lenone , velit. Felix , si denique macram
 Extuderis Chriam , aut glabro recitanda Puella
 Carmina , privato quae rara corona residens
 Audiat hemicyclo , & laudet forte unus & alter
 Aequior. En merces studiorum , & ventris aquosi ,
 Pallidulaeque genae ! ut Tibi fama domestica plaumat ,
 Teque breves noscant , admirenturque Penates.
 At nos interea , a puppi spirantibus Euris ,
 Egressi portu , & praeter spatia ultima vecti ,
 Immensum volucris cymba transnavimus aequor :
 Victuri quoque adeo post tetram funeris horam ,
 Et fato & cineri medium porreximus unguem.
 Consulimur , responsa damus : nec Pythia tanto
 Concursum est hominum circumstipata , furentem
 Cum quateret stimulis unde unde intrusus Apollo.
 Denique quam late Doctorum publica se se
 Res aperit (quid habet porro haec spatiosius aetas ?)
 Regnamus , magni princeps Persona Theatri.

Quod-

(d) Forte iste Salmorius , ad quem sermones missi sunt , est Ludimagister.

Quodque magis mirere , anno non amplius uno ,
 Et minimo sudore , & amico abdomine salvo ,
 Hunc apicem , haec nos adtigimus subfellia. Tanti
 Refert scire viam , quae per compendia ducit.
 Haec olim intentata , & avis ignota , velut qua
 Itur ad auroram , & fuscis modo Cercopithecis ,
 Hercule posthabito : paucos ideo Jovianos ,
 Paucos Synceros Leo (e) computat ; unicum & illum ,
 Ulcera qui iussit castas tractare Camoenas ,
 Dum vada Benaci dulci Siphillide mulcet.
 At nunc , Murrano (f) pridem praeunte Columbo ,
 Est multis inventa. Minus patet Appia , nec tot
 Adteritur soleis. Fruticantes inde videmus
 Fungorum in morem Sapientes : plena Poëtis
 Oppida cuncta : Sophos , Oratores , Geometras
 Ausoniae fundunt urbes , vicique Latini
 Eluvie numquam sicca , venaque perenni :
 Ut nec (g) agonalis videat tot oluscula Circus ,

Ag.

(e) Leonis X. P. M. aetatem significat , in qua Jovianus
 Pontanus , Syncerus Sannazarus , & Fracastorius (qui de
 morbo Gallico scripsit) floruerunt.

(f) Non dubito quin iste Columbus sit Dominicus Lazza-
 rinus à Murro.

(g) In foro agonali , quod Romae est , amplissimum , olera
 vendi solent.

Aggere nec tanto cinarae cumulentur, ubi aſſe
 Vicenae proſtant; nec tot ſimul Appula muſcas
 Arva ferant; nec tot vendat mendacia falſi
 Inſitor unguenti; nec tot tranſmiſerit orco
 Inſontes animas matricula ab uſque Diaulus;
 Nec tot ad immitem ſuſpiria mittat Alexin
 Cardiacus Corydon; nec tot deliria libris
 Adſuerit Logicis, Phyſicis, aliisque Noriſcus (b):
 Quam multos cenſent haec aurea ſaecula doctos,
 Et ſtatua dignos, immortalique corolla.

Quo minus admiror, ſi circum pulpita veſtra
 Area lata patet, rarique in gurgite vaſto
 Adparent nantes, & nuda ad ſcamna tonatis;
 Atriaque innumeris imberbibus ebullire
 Viſa prius, nunc moeſta ſilent, & pulvere ſordent:
 His etiam peiora time: de Gymnade fient
 Horrea; quaque ſedes nunc Gymnaſiarcha Curuli,
 Forte olim rubras calcabit Villicus uvas;
 Et Cereri, & Baccho ceder Dea Gorgone gaudens.
 Nam quis cum poſſit pueros adtingere fontes
 Eloquii, & cano Sapientum inſidere circo
 Bullatus, primaque genas lanugine tinctus,

Non

(b) Scriptorem hunc eſſe puto ex iis, qui agunt de omnibus
 rebus, & de quibusdam aliis.

Non faciat? quis jacturam tam praepetis aevi
 Non redimat, postquam curtam expertemque pericli
 Monstravere viam Superi, nullique negatur
 Hac iter ad laurum, sit quamvis mentis obesae,
 Duraque palmari rigeat calvaria lardo?

Sed ne semper humi jaceas inglorius, & Te
 Erectum ut possis peregrinae ostendere famae,
 Adcipe jam divinam artem, penitisque inedullis
 Conde Magisterii leges ex aethere lapsi.
 Utitor inde etiam, si quid te scalpturit intus
 Gloriola, ingenii merces quae sola disertis.
 Sed Rullo (i) grates age: Rullo, qui mihi primus
 Dux fuit erranti, callem & monstravit amicum,
 Discutiensque bonus tenebras, lucem obtulit almam.
 Namque ubi me primum longo post tempore vidit,
 In teneros ruit amplexus, oculisque minutum
 Distillans rorem, & dilutus nectare multo,
 Oh nimium infelix, clamat, cui portio vitae
 Optima, per vigiles nequidquam insumta lucernas,
 Optatam negat usuram, & spem pascit inanem!
 Quando erit, ut sapias? Tu te ipse retexere debes,
 Quaeque animo increvit, penitus conradere crustam,

Si

(i) *Quis sit iste Rullus, incertum. Hic certe primam inter Graeculos personam gerit.*

Si quid amas vulgo fecerni: dum mala menti
Haerebunt, quadrupes quae semina Paedagogus
Insevit, plenas frustra expectabis aristas,
Pomaque laudandi succi, gratique saporis.
Crede mihi, nam me pariter (lugete, Nepotes,
Damnum infandum atrox, auctoris morte piandum)
Credulum, & incauto sorbentem quidlibet ore,
Decepit misere, ac duxit per devia Rhetor
Nondum barbatus: cujus me inscitia tandem
Jejunum, & solida fraudatum fruge reliquit;
Quamquam animus solers esset, patiensque laboris,
Ingeniumque ferax, & non inimicus Apollo.
Oh frustra noctes vigilatae! oh perdita vitae
Pars melior! Raro portavi flumina cribro
Nimirum, & steriles impressi littore sulcos.

Heic ego: Credo equidem; nam quid condiscere posset
Sinciput hoc asini studia inter sacra Minervae?
Ajebam tacitus. Verum damna illa juventae
(Quod bucca majore crepat) reparavimus; illi
Major & imposita est tandem structura ruinae.
Di mihi, Di faciles, quorum sandalia numquam
Incerabo satis, radio fulsere sereno,
Ut me conligerem, & mentem ad meliora referrem.
Tum praeconcepas penitus dediscere nugas

Ad-

Adgressus, fulvos lemniscos, bracteolasque
 Damnavi, fatuosque sales, & quidquid amarunt
 Et pater, & patruus, nati infelicibus annis;
 Et totum ejurans nigræ rubiginis ævum,
 Vana Magistelli risi praecepta togati.
 Post ubi germen id erroris vitiique revulsum est,
 Involo in Augustum (k) recta; eloquii que fluenta
 Ipso e fonte bibo, & pretioso ingurgitor auro.
 Jamne vides, quanta se Majestate Verustas
 Explicet illa nitens? Quae sit constantia dictis?
 Quam comtae Veneres? seu rostra Orator inundem,
 Et torrens rapido volvatur flumine sermo:
 Ludere seu malim numeris, gracili que sonare
 Pectine, & epotas ructare Aganippidos undas?
 Hujus ego laudis soli mihi debitor, & Dis:
 Nam, quod jurato vix posses credere testi,
 Ipse mihi Dux, ipse viae comes unus: egomet
 Me castigabam interdum, mihi saepius aurem
 Vellebam, reus idem, ultor, praeceptor, alumnus.
 Quod non Ingenio sperandum, & Numine dextro!
 O Rulle, o felix & fortunate laboris!
 Sic Te Numina ament semper, serventque beatum:

Dic,

(k) *Ætas Augusti aurea dicta est, quod sub illud tempus maxima fuerit dignitas Latini sermonis.*

Dic, rogo: quandoquidem primum hoc mihi rere cavendum,
 Ne monstrata prius nostros trahat orbita gressus,
 Quid faciam? quove ire jubes? quod consilium das?
 Nullus ad haec, crispans erectam ad grandia frontem:
 Da Tiberi propere, aut flammis, quoscumque solebas
 Suspensa ex humeris pera gestare libellos,
 Alvum cum trepido tibi nola invisa cieret (1)
 In mediis audita jocis. Etiamne natabit
 Tullius? aut tristi crepitabit Horatius igne?
 Ardebitque iterum cum grandi Troia Marone?
 Nec pius Aeneas, nec flammam evadet Iulus?
 Alvarus absumatur, ait (m). Quem das meliorem?
 Nam mihi deterior multo, atque obscurior ille (n)
 Carmine qui Tusco puerum inradiare professus,
 Nil praeter risum & fannas huc impetrat usque
 Versiculis blaefis, arentibus, & monogrammis,
 Quos numquam capias sine sphinge, & dicere Tuscos
 Nemo velit, vix Italicos, planeque Sicanos.

Sunt

(1) Scholae adeundae signum, quod pueris aliud agentibus timorem afferre solet.

(m) Emmanuelis Alvari Grammatica notissima.

(n) Respexit sine dubio ad Grammaticam Portus Regalis in Italicum sermonem conversam.

Sunt alii tamen, omnino quos perdere debes;
 Scriptores multum insulsi, multumque nocentes.
 Quid praestare potest, cunctas qui codice parvo
 Stripavit fandi leges, alacremque puellum
 Rhetoricam docet ambire, & veste induit alba? (o)
 Tolle illum fodes: Unus pro mille Magistris,
 Judice me, poterit tibi Cavalcantius esse,
 Divinus plane Rhetor, cedroque linendus.
 Hunc, si vis, magni facio, inquam: quid tamen, oro,
 Quid peccat mundus, nitidusque Colonia (p): cujus
 Omnia scita ab Aristotele, & Cicerone revulsa,
 Primaevisque aliis, aureo cratere propinant
 Consulibus dignam gravitatem; artemque loquendi?
 Nil agis, ille refert; & ad haec subtemine Graeco
 Est opus, ut Latio valeas intexere filo
 Telam admirandam. Romana vocabula frustra
 Scrutaris, primos aperit nisi Graecia fontes.
 Proxima enim consanguinitas linguam inter utramque
 Hoc facit, ut coeant semper: de ventre prioris
 Prodit haec, multumque refert de matre Pelasga,

Estque

(o) Significat libellum olim valde usitatum, qui inscribitur Candidatus Rhetoricae.

(p) Auctor libelli nunc usitatissimi, in quo oratoriae artis elementa traduntur.

Estque eadem paene ecfigies in dispare vultu.

Laudo consilium , Rulle; & piget, Hercule! nunquam
Vidisse Euripidem , & Graii miracula Socci.

Quandoquidem vero praegnantis fluxit ab alpha
Lingua Remi; cur formosam mihi jungere natam
Non liceat, nisi mater anus consentiat, & ni
Flammeolum taedasque paret? Num nomina rerum
Scire vetor, nisi qua fuerint radice revulsa

Callidus explorem , & genesis mihi tota patefcat
Tuberis, & caulis, pulsantis & ilia porri?

Ille etiam sermo vernaculus & popularis (q).

Quem nos edocuit fugentes ubera nutrix

Tuscula, somniferi longa inter taedia lalli,

Ille, inquam, linguae se de matrice Latinae

Natum ait, ut puto scis, aviaque superbit Achaea:

Illum & abortivo tunc fudit adultera partu

Aufonia, hirsutos quom primum amplexa Gelonos,

Braccatosque alios , audire exotica verba , &

Non intellecto didicit parere Tyranno.

Quod tamen indigenae possit Deus esse loquelae

Italus

(q) *Est ratiocinium auctoris. Sicuti ex Graeca orta est Latina lingua , ita ex Latina orta est Italica : si ergo potes optime callere Italicam , ignorans Latinam ; cur non possis callere Latinam , ignorans Graecam ?*

Italus, ut nunquam paradigmata Grammaticorum
 Viderit, & Musam non declinaverit; ille
 Exemplo esse potest, qui de Tonfore Poëta (r)
 Furfure in Etrusco censetur idoneus auctor,
 Donatus glossa jamdudum & margine lata:
 Nec minus exemplo est parvus cum patre bubulco
 Pastor, legitimas qui frangit gutture voces,
 Dum pecus increpitat, vicinum & cogit ad Arnum.
 Mi satis est igitur, possim si promere voces,
 Quas Crispus, Liviusque suas non pejeret, & quas
 Lividulus censor non ausit rode re: Vocum
 Tu genus & proavos primo scrutabere ab ovo,
 Si vacat; Aeolas & crucies Doresve licebit,
 Scilicet ut spuriae constet tibi vocis origo,
 Grande operae pretium: quin, si res postulat, aude
 Visere Graecorum attegias, & nomine magno
 Gaudentes inopum nidos: ibi plurima disces
 Quæis fies magnus conducendusque Magister,
 Inter & insignes dignissimus incola (s) Iones.

Haec ego; sed quoddam in verbis cacofynteton esse

In-

(r) Burchiellus, cum esset Tonfor & indoctus, scripsit Endecasyllabos, quos Academici Florentini della Crusca minime respiciunt.

(s) Est quædam in conjunctione barum vocum cacophonia Italis satis nota.

Inclamat Rullus , pia quod fastidiat auris ,
 Offensusque malo nasum congruat odore :
 Nec stomachum tenet ; at rubicundam sanguine & igni
 Contorquens aciem , & totis pulmonibus ecflans
 Fulmineam bilem : Te ne isto marmore frontis ,
 Tene ullis herbis , aut ullo posse juvari
 Fomento , egregiam Medici miserantis opem qui
 Negligis , & mordet praebentem pharmaca dextram ,
 Delirans , amens , atque insanabilis aeger ?
 Ergo apage ; & sine rivali placeas tibi , teque
 Solus ames : jam non operam sumemus inanem ,
 Quin placito magis atque magis marcore putrescas ,
 Foedaque adulanti detergas ulcera lingua.
 Esse verecundum & docilem super omnia Alumnum
 Praecipio , mollique admittere dogmata cera ,
 Si rem sanus agit. Viden ut Gallus Cithisusque (1) ,
 Felices animae , & natae laetantibus astris ,
 Me dicente silent , & acutis auribus adstant ,
 Nec tussire audent , nec deglutire salivam ,
 Nec nivere oculis ? Ideo gratissima Phoebo
 Jam mandunt folia ; & quotiens simul Arcades omnes
 Convenere , sedent in prima parte Theatri.


Jam-

(1) *Duos esse arbitror Rulli discipulos , quos ille ad novum Litteraturæ genus instituat.*

Jamque vale; de me posthac ne quaere: Putabis
Depositum, aut nostros, si mavis, ductum ad Iones.

Sic ait; iratusque, & caeco turbidus aestu,
Multa dolens probrum. & nostrae argumenta phrenesis.
Terga dedit: nec jam ex illo me occidit ut ante
Grandibus adloquiis, laudum & clangore suarum,
Ampullisque meris. Vos me servastis Iones.





SERMO SECUNDUS

SIC igitur statuas, Salmori, ex omnibus esse hoc
Grande rudimentum, ut vetus & laudata tot annis
Discendi ratio nigro carbone notetur,
Nullaque Gymnasii sit jam reverentia cani.
Praecipit hoc primum festae Bagnarius (a) auctor,
Hoc recitat teneris ante alpha & beta Puellis
Orbilius, mire juvenes formare protervos
Doctus, idem & poscit jurari a simplice turba :
Hoc demum quicumque placet sibi nomine docti
Postulat, atque inter fatalia ducit habendum.
Sic est : Emeritos contra ferat arma Magistros,
Qui modo vult dici sapiens : Ex hoste probari,
Et magnis inimicitiis clarescere, notum est,
Et vetus : Hoc multis aditum patefecit ad astra.
Quidni etiam facias ? Pronum est everfa crepare
Jura, dolo abreptos juvenes, fractam gravitatem

Elo-

(a) Significatur Dominicus Lazzarinus, contra quem
prodiit olim libellus sic inscriptus Bagnarius Paedagogus ad
scholam revocatus.

Eloquil, fatuis spurcata elementa rubricis,
 Et totum innumeris vitiatum pestibus aevum.
 Haec quantum potes, ut clamosum Stentora vincas;
 Testare intrepidus: sed & illos saepe vocabis
 Delicias hominum atque tuas, mediisque locandos
 Divorum Ordinibus, quos quingentesima vidit
 Caelicolis dilecta aetas, purique metalli,
 Prima renascenti quae praebuit ubera linguae.
 Qui vir (b), &, oh superi! quantus Victorius! At ne
 Naugerium spernas. Major sed Bembus utroque.
 Oh ubi Castilio, Sadoletus, Molsa, Faërnus!
 Varchius addatur, geminusque Manutius, & qui (c)
 Propter Castalides ad lilia fulva vocatas,
 Certavere odiis, quae forte Vatinius ipse
 Diceret immodica. Indiculus tibi proderit horum,
 Quos fronte & titulo non est res ardua nosse.
 Hos solos sapere, huic auro decedere dices,
 Scriptorum quae mox successit aenea proles:
 Hos usque obtrudes laudans per fasque nefasque.
 Hoc bene si praestas, & frons tibi sufficit, & vox;
 Monstrari digito multa inter millia tento
 Paullatim incipies; tantam & mercabere famam

Exi-

(b) Recenset hic aliquot Scriptores, qui Saeculo XVI. floruerunt, quod saeculum vulgo dici solet quingentesimum.

(c) Notum est quales inimicitias exercuerint Hannibal Carus, & Castelveirius, ob quamdam cantianculam, cujus hoc erat initium: Venite all' ombra de' bei gigli d'oro.

Exiguo hoc pretio, quantam Culicamus (d) abactis
Jam saepe Odrysiis, & caudis mille superbus.

Nec tamen intererit, si, quorum nomina laudas,
Scripta male adfectes, geniumque imiteris ineptus.
Si qua tibi Italice scribenda est Concio, non est
Cur sis sollicitus de corpore, luminibusque,
Et numero, & nervis, atque ordine: Summa laboris
Haec tibi erit (e), passim ut glomerentur nomine in uno
Tres saltem voces, sed trivolae idemque sonantes;
Semper & extremo respiret pagina verbo.

Hoc satis, ut verulum dicaris habere saporem
Felicis venae, Galateus & exeat alter (f).

Oh Casa, semper adorandum mihi nomen, & unus
Quem paveat merito facundia tota Nepotum:

Agnoscisne istos, qui te patremque ducemque
Saepe vocant, queis nulla placent, nisi rancida verba,
Quae vetat, expungitque usus fandi arbiter, & quae
Tu quoque respueres, credo, hac aetate, reverti

Si

(d) Celeberrimus hac aetate Persarum Imperator, qui ex
Turcis (quorum est militare insigne cauda equina) saepe nume-
ro triumphavit.

(e) Hoc maxime curant qui saeculi XVI. stylum inepte
aemulantur sermone Italo, ut multa agglomerent epitheta, &
verbum substantivum in periodi finem rejiciant.

(f) Titulus libri de Urbanis officiis, auctore Joanne de la
Casa.

Si possēs iterum nostrae ad commercia vitae?

Anne tuus sermo sine succo & sanguine, frigans,
Flaccidus, exanimis, qualem nunc audio? Ubi vis,
Et color, & nitor ille tuus, nūmerusque per aures
Leniter inlabens, ima & praecordia quaerens?

Sic jam res agitur (g). Sententia cognita lippis,
E medio conlecta foro, madidave taberna,
Ducitur in gyrum, quantum vix porticus ambit,
Pro Vaticano quae curvat brachia Petro.
Hinc atque hinc longo cariosa vocabula textu,
Particulis multis confuta, & nexibus uncis,
Aulaea, & telas imitantur versicolores,
Per quas magnifico incessu transire jubetur.
Dum graditur lente, tumidos fricat alter ocellos,
Alter hiat, scapulas est qui contorqueat ambas,
Alternetque natem; ronchissat maxima pars e
Confessu, frontemque plicat: Recitator anhelat
Jam decies, pergīt tamen ultra, & stipticus udas
Guttatim eiecit voces: quid denique? Post tot
Circuitus exit, quod *Roma est Tibure major*:
Quippe novum, atque ingens, tanto & conamine dignum.
Volvitur inde parem similis vesica per orbem,

Post

(g) Describitur inanis illa verborum prolixitas, qua Graeculorum orationes laborare solent: allegoria ducta ab solempni pom-

Post alia; extremo donec concludit hiatu,
Dicebam (b) Superi! grates: sed de aggere tanto
 Verborum, quota particula est, quam tollere velles?
 Quantum & illud erit, quo fias doctior hausto?
 Ut jam pexa nimis, calamistro ambustaque saevo
 Pagina, nil praeter fucum, gerrasque meracas
 Porrigat, & levibus placitura crepundia Pupis,
 Sic operosa dies instat noctesque labori,
 Fila trahens retrahensque, & totam dissipat alvum,
 Cassibus aëreis ut captet aranea muscam.

Et tamen hoc bene qui faciat, licet usque patentes
 Adspiciat fauces, & ronchos audiat, ut qui
 Multum dicendo nil conficit; illè Casinum (i)
 Suspendit naso, poscitque ut vapulet ingens
 Segnerus, & quidquid laudati est nominis usquam,
 Nil miserans proteribit, habens discrimine eodem,
 Si purum putumque Casam, quem diligit unum,
 Non oleat: Tantum ille Casae tamen aequiparandus,
 Quantum homini Vervex. Adeo est imitatio Summi
 Difficilis, Vitium magna exemplaria majus

Sæpe

pompa, qua ven: Sacramentum per porticus Vaticanæ Basilicæ quotannis circumfertur.

(b) *Hac voce suas plerique orationes claudunt.*

(i) *Card. Casinus, & Paulus Segnerus, duo præstantes recens memoriae Oratores.*

Saepe ferunt, si cor desit; minus & mediocri
 Crimen ab archetypo communi ducitur usu.
 Tunc etiam, natura Parens quom fingere mirum
 Aggressa est nimiumque animal (k), quod limite solo
 Mentis ab humana distaret imagine, nata est
 Scurra ferox, pygas ostendens Simia calvas,
 E Mauritano foedissima bellua saltu.

Quorum haec? Non ut propositio moveare, sed artem
 Ut teneas, cuius summa est imponere; nec jam
 Virtutem quaeras, vanam virtutis at umbram,
 Nam quae Religio, quom falli gaudeat aetas,
 Et pretium referat magni impostura laboris?
 Tempus erat, solido quom starent marmore Tempia,
 Et Thermae, & Circi, & ferientes astra Colossi:
 Oebaliam, niveamque Parum, & Nilotica rura
 Vertebat cuneis Romanus fossor adactis:
 Scilicet ut grandem mons integer iret in urnam,
 Unaque dissecto traheretur Pyramis arvo.
 At nunc securis eadem prope marmora venis
 Multiplicata vides; conciso e rudere quando
 Fiunt pagellae (l), quales quom praebet avarus

Par-

(k) *Simia nullum animal homini similis, nullum fortasse deformius.*

(l) *Ars haec incrustandi parietes marmore in subtilissimas quasi laminas secto, nullibi magis quam Romae viger.*

Parmensem, aut siccum natis poscentibus armum:
 Quois apte inter se junctis, viscoque tenaci
 Compactis, augentur opes, disruptaque Galbae
 Tibia sublimem potis est vestire columnam,
 Et de dimidio fit nobilis ara Nerone.
 Haec tamen artificis laudant mendacia dextrae
 Romulidae, & gaudent tunicato pariete, quantum
 Si victura iterum starent Capitolia. Tanti est
 Vana superficies, quom solus judicat unguis
 Aut oculus. De litterulis quid sentiat hic, aut
 Ille, quibus rectam dederunt bona Numina mentem,
 Dissimulo; sed plerique ut de marmore, cujus
 Nil praeter crustam. Felix cui fallere plures
 Contigerit! Linguae quid tantum operaris Achaeae,
 Discendoque bonas consumis prodigus horas?
 Utilis illa quidem; sed erit simulata perinde,
 Et rediment longum tibi paucula verba laborem.
 Dixeris egregie (m), si passim admistus inanes
 Inter fabellas intercidat Hellenismus,
 Aut nova, sed duplex, oriundaque stipite Graio
 Vocula. Nec tibi jam posthac sartago rotunda,
 Cyclica dicatur: sit deinde Ellipticus ovi

Ambi-

(m) Sunt qui Graece scientes videri volunt, quod ejus linguae pauculas voces didicerint, quas tertio quoque verbo solent exprimere.

Ambitus: aſt Hominem Microcoſmi nomine dices:
 Tum rivis, avibusque, Poëtarumque procellis,
 Pictorum & ſylvis, præfiges rite Parergon (n).
 Quid ſi Thucydides interdum aut Pindarus ore,
 Quid ſi & Ariſtophanis *νέφελαι* & *ῥαψῳδία* Homeri
 Perſonat? oh quales adſueſces cernere rugas,
 Quæle audire Sophos! Mirabitur æthere lapſum
 Grajugenam Coetus. Minus hæret Villica, nec ſic
 Ora tenet, quom quartana flagrare Maritum
 Sollicitam, lento docet angier hemitritæo
 Verboſus Medicus, longeque ambage petita
 Implicat adtonitam. Curtae eſt prudentia mentis
 Laudare ignota, & temere admiranda putare,
 Quæ bene non capias; ſed & hæc Prudentia multis
 Eſt hodie, neſcire aliquid queis turpe fateri.

Laudat Aligherium (o), & fumantes ſulphure bulgas
 Maxima pars hominum: quotus eſt tamen, aurea vatis
 Qui ſenſa, & ſenium Muſæ, & mirabile textum,
 Et caligantes ſacra rubigine gemmas
 Tangat acu? Pauci, clara queis lampade pectus

Incen-

(n) *Parergon* Græca vox, qua ſignificatur quidquid præter opus præcipuum vel Pictores, vel Poëtæ cudunt, ad augendam operis venuſtatem.

(o) *Dantes Aligherius* divinus Poëta, cujus notiſſimum eſt *Tartarum* in plures, ut ipſe ait, *Bulgas* diviſum.

Incendit, rerumque arcana recludit Apollo.
Oh fatuos! clamare libet. Num provida bulbum
Imposuit collo natura? aut nobile frustra
Erectumque caput dederit, mentemque capacem,
Aethereamque luto mortali adflaverit auram?
Quo vis illa animi? quo particula ab Jove summo
Defecta? An pecudes inter, Pyrrhaeque Nepotes
Esse aliquid credam, quom laudit non sibi notis
Laudator luscus? Non haec ego despiciam, sed
Nec laudare velim sanus, si me Attalus ore
Supplicibus gazis, aut certet vincere Praetor,
Furum Tortorem, virgas, ergastula, furcam,
Ni faciam, indicens: cujus vel maxima causa,
Quod sum liber homo. Si se cognosceret aequè
Vulgus iners, non tam facilis, nec publica laudis
Mercatura foret: fortasse & Graeculus audax,
Quem male vexat honor, famaeque urtica perurit,
Disrupto jecore innatam egereret caprificum.
Nunc autem Kappas aliquot si forte & Jotas
Struxerit, Ausonio damnatas nubere metro;
Semimaresque tonent, quos vix intelligat ipse
Qui recitat, versus; Bene, nequiter, euge, beate!
Oh amor Aonidum! oh rebus decus addite nostris!
Ferte citi lauros, lauris innectite flores:
Huc, pueri, violas, huc plenis lilia cistis.
Fundite: nulla Venusini jam gloria: sorder

Naso, & in exilium tantum non mittitur: ipsi,
 Ipsi adeo sacrae nutant in fronte corollae
 Virgilio, atque aliquis divinam Aeneida culpat.
 At de Flaminio (p), & Cotta, dulcique Rapino,
 Fiunt pileoli oenophoris, piperique lacernae,
 Aut aliud quiddam putens, quod dicere nolo.

Proh pudor! Interea de nostro scurra superbit
 Callidus, & graphice technam succedere gaudens,
 Pellis ut ingesto tumuit quae plumea vento,
 Exsilit, insultat. Quid Rullus? quid caput illud
 Plenum Euro Boreaque, Ithacos quod vinceret utres?
 Jura Stagiritae (q), longum inviolata per aevum,
 Ipse palam damnat, dicique Geometra mavult,
 Quam Logicus, quom sit caudex in utroque. Lycaeum
 Cur tamen adcusat? quae odii scintilla? quid est, quod
 Tortilibus syllogismos magis anguibus horret,
 Semper & argutis commissa Triangula quadris
 Ostentat? Promptum est Tacqueto (r) nempe magistro,
 Ducere lineolas rectas, & ducere curvas,
 Multiplici & flexu struere ancipites labyrinthos;
 At fugere incursans lunata fronte dilemma,
 Admotumque gulae nodum, & spirare vetantem,

Sol-

(p) *Nomina trium illustrium Poëtarum.*

(q) *Aliud imposturae genus bodie usitatissimum, damnare Aristotelis Philosophiam.*

(r) *Nomen auctoris, qui Geometriae elementa explanavit.*

Solvere difficile est. Adde huc, quod mystica figla,
 Et magicas illas pueri indoctique figuras
 Non capiunt, laudantque tamen; majoraque credunt
 Prodigia, ardentes quam quom vomit ore favillas
 Ludius, aut agiles varians sub pixide baccas,
 Distinet ignavum mirando errore popellum.
 Inde etiam tereti lucet spectanda tigillo
 Aenea Caelorum effigies (s), ubi plurimus Orbis,
 Aetheraeque serae, & graduum discrimina; quorum
 Si quaeras numerum, digitis percurrere totam
 Protinus incipiet decumana cucurbita Rullus.
 Inde nitet laevi deterfus pumice quadrans,
 Regulaque, clavusque bipes ducendus in orbem,
 Et multum sudata dioptra, Thiconis & arma
 Omnia, non equidem fatuis imponere nata,
 Semper & ad plutei dextram vigilare jubentur:
 Quae tanto digni Gallus Cithisusque magistro,
 Tamquam sacra colunt pavidi, metuuntque profana
 Adtrectare manu: At si quando Rullus ahenas
 Cum stridore rotas impellit, & horridus haeret
 Cuspide suspensa; tremere ambo pallidiores
 Et cinere & buxo: casurum concuti ab imo

Quip-

(s) Sphaera, quae dicitur armillaris, aliaque instrumenta
 Mathematica Graculo sermone familiaria, ad ostensandam hujus
 scientiae perisiam.

Quippe timent orbem, & Caeli convexa labare,
Percutiantque sinum palmis, & Numen adorant.

Artibus his afinos capies, cerebrique minores
Tu quoque, perpetuo quorum celebrabere bombo,
Quam late genus hoc citra Alpes regnat & ultra.
Quin properas igitur potioribus addere libris
Euclidem? Satis est, si magna vocabula discas;
Et diagonales, tangentes, atque secantes,
Prisma, parallelas, rhombos, polygona, cylindros
Usque crepes. Si te piget hujus, discе papyrus
(Momenti exigui res est) variare figuris,
Quas modo si demas, nemo sophus audiet umquam.
Pneumaticum calamo (†), Boyle quem condidit olim,
Pinge tholum: rapidis nec dissocianda caballis
Aera cava, inter quae medius non permeat aër:
Describes & inaequalem siphona, tubosque
Multiplices, cluso doctos signare liquore
Temperiem, aestatisque vices, summumque decembrem.
Quae tu cuncta notis passim distincta, bacillo
Monstrabis longo, causasque & nomina dices,
Blandimentum ingens bibulis facturus ephebis.
Materiam vero, ac formam, ramosque comantes

Por-


(†) Indicantur aliqua experimenta circa aëris pondus & elastium.

Porphyrii, veterum Canones quoque Stoicidarum,
 Socraticamque vetustatem, majore cachinno
 Excipies, quam mentiti triscurria nasi,
 Aurea quom Nuribus (v) samulatur cymba Latinis
 Per siccum gradiens, & Bacchanalia fervent.
 Quid facias? jubet hoc aetas, & Gallia victrix (x).

(v) *Respexit Poëta ad currus uaviculis quam simillimos,
 quibus Romanæ Matronæ vehi solent per Bacchanalia.*

(x) *Ita nempe fert rerum novarum studium, quod in Gallia
 maxime viget.*





SERMO TERTIUS.

Quis mihi nunc aurem tinnitus percutit aures?

Denuo Rullus adest; & tintinnabula forte

Obtinuit, misero jampridem debita collo.

Papae! Centenis strident marsupia nummis (a).

Unde haec ubertas? Nec enim patrimonia tota

Distrahere optanti tantum daret Hasta peculi.

Sis salvus, Rulle, & proût, nummatus abunde

Quod, ni fallor, ades. Sed non vulgaria sunt haec,

Non, inquit, noto percussa numismata praelo,

Quod tu rere. Habeat sibi talia dives avarus,

Et cui forte datum est. Nobis virtutis amica

Aera placent, & quae doctrinae fida ministrent.

Mirum est quod narras; accendis & illa videre

Ut cupiam: profer, fodes, Facio imo libenter.

Nec mora: bis centum exesi fragmenta metalli

Pellicula inversa depromit, & incipit: Haec est

Aureli facies: Procurrens adspice mentum,

Horrentemque pilis barbam. Heic galeata superbit

Ro-

(a) Antiquiora numismata aliud eruditionis coput, quo etiam male utitur Rullus, ad captandam litteraturae famam.

Roma: vides praelongam hastam; cristasque minaces?
 Quae tamen haec, nudas monstrat quae turgida mammas?
 Augusti Neptem agnosco, matremque Neronis.
 Infelix mater! sua quam malesuada volentem
 Perdidit ambitio, & regnandi dira cupido.
 En tibi cum Nato sculptus nitet Emptor Olynthi (b).
 Quid melius, superi! nullas huic comparo gemmas;
 Osculor & Graia contusam incude monetam.
 Huc jam flecte acies. . . . Satis ohe: quo, bone, tendis?
 Quiddam habeo quod agam, & non est mora libera nobis.
 Dic mage, quid totum hoc congesti conferat aeris,
 Quom tibi reticulum panis, vinique trientem
 Caupones opici renuant praebere roganti,
 Triplex legitimo nisi fulgeat asse corona (c)?
 Et pane & vino melior doctrina. Ita sane:
 Dic ergo, quae cum vetulis cognatio nummis
 Sit modo doctrinae? Sapientum ex ordine nullum (d)
 Invenies hodie, inquit, in hoc qui pulvere multum

Non

(b) Philippus Alexandri Magni pater, qui Olynthum Thraciae urbem auro maluit expugnare quam ferro.

(c) Triplex Corona, quam Triregnum vulgus appellat, insigne est Pontificiae monetae.

(d) Vide quid respondeat Rullus, atque intelliges, non numismatum cognitionem, quae utilissima est, sed hujus cognitionis simulationem hic derideri.

Non sudet. Credo : quid postea? Pluris emuntur
 Hae modo relliquiae , & veterum monumenta Quiritum,
 Quam librale aurum , rigidaeque a Mentore lances.
 Credo iterum; verum quid conficis? Omnia cernes
 Musaeae , ingentes Regum quoque Pinacothecas,
 Augusta numismatibus , spissis quae didita cellis,
 Grandia defendunt e laevi scrinia buxo,
 Lubrica ne subeat musca , aut pulvisculus audax
 Laedat honoratos vultus , doctamque senectam.

Audis , Salmori , haec , & rides? sanior esses,
 Pendere si velles aliquid; quom possit ahenam
 Vendere doctrinam Laterani vinitor agri , (e)
 Quisquis & incurvo subigit Latia arva ligone.
 Oh factum male! quod sero haec sapientia caecis
 Emersit scrobibus , prudentis munere marrae.
 Oh aetas miseranda Patrum! quom talia soli
 Curabant monumenta Fabri , tantoque metallo
 Vascula fiebant , pelves , crassique lebetes,
 Plurimus & tumidas migrabat Caesar in ollas.
 Haec tu ne pereant cave; (f) sed nec sperne lucernas ,

Fictilia

(e) *Verusta numismata sapissime à fossoribus in agro Romano reperiuntur.*

(f) *Non solum numismata , sed quaelibet antiquitatis fragmenta conquirunt diligenter Graeculi , ut succum faciant.*

Ficilia & vasa, & sacras DIs manibus urnas,
 Poculaque, & patinas, muscosae & fragmina Trullae;
 Consule quae scripto senuit, gypsoque notata.
 Quid plura? antiqui nec Consulis excrementum
 Abiicies, si forte viae inter rudera sacrae
 Tale quid existat; vitrea sed pixide sterus
 Servabis caute, lasano quod putruit olim
 Forre Corinthiaco: & certe vestigia odoris
 Magni servat adhuc, solerti iudice naso.
 Denique quidquid erit defossis forte sepulchris
 Inventum; saxa in primis, quae in funere acerbo
 Natorum moesti tumulo imposuere Parentes,
 Et quae libertis libertabusque Latinus
 Rite inscripsit Eques privati in cespite fundi;
 Accipies veluti simulacrum Palladis axe
 Demissum, inque domus adyto interiore locabis.
 Felix, paullatim si maxima crescat apud Te
 Ex aere, argilla, vel marmore Presbyotheca,
 Advena lustratae quam post Sacraia Romae
 Gestiat adspicere, & Pubes studiosa frequentet.
 Tum super his quaecumque voles narrare licebit:
 Vera an falsa, reus nullo sub iudice fies;
 Dum rigeat vultus, dum vox non haereat unquam,
 Fingere & intrepide discas (g), Frontone Magistro.

Non

(g) Non dubito quin iste Fronto sit unus aliquis ex impudentioribus impostoribus.

Non ego propterea veto te conquirere libros (b),
 Quos membrana tegit, doctaeque volumina chartae.
 Quin age, & hoc etiam tot demum fraudibus adde,
 Ut tibi Scriptorum pateat longissimus ordo.
 Utile & hoc multis: sed enim delectus habendus,
 Curandumque prius, ne cui pittacia desint
 Aurata, ut minio niteant hinc inde rubello
 Chartarum limbi, nullusque ex ordine peccet,
 Et serie in tota mensura sit omnibus una.
 Nec minimum intererit, quo tempore prodierint, quo
 Impressore: Unum renes mutare trecentis,
 Pagina si Junctam (i) referat tibi prima vel Aldum,
 Fumida sit quamquam, & tineis erosa papyrus.
 Dicet idem, & melius fortasse Cuminius (k): Esto:
 At nunc venantur prisca exemplaria docti,
 Et potiora typis ducunt chirographa, quorum
 Vix longo exprimitur tormento syllaba verax.
 Num tecum nugor? num non haec serius aio?

Quot

(b) *Alia Graeculorum fraus in copia, & delectu librorum.*

(i) *Celebres saeculo XVI. librorum Impressores.*

(k) *Diligentissimus Patavii nostra aetate Typographus.*

Quot modo Calliphanes video (1), quæis magna librorum
 Congeries præstat tantum hoc, ut Bardocucullis
 Imponant pulchre, & vana ambitione ferantur!
 Multos Rullus habet, conquisitosque libellos.
 Quid tum, si totos dormire jubentur in annos
 Pulvere conspersi, & præbent convivia blattis;
 Ipse autem præter titulos nil adtingit unquam?
 Sed facito adtingat: duro de subere cortex,
 Dum legit, obstitit misero, ingeniumque bilibre
 Attamen, ut facile indocti capiuntur, Olympo
 Copia librorum, tegumentaque Gallica Rullum
 Imposuere. Putat tam stultum nemo, coempta
 Cui fuerit magno nil profectura supellex:
 Et vero prodest, dum veram excusat inani
 Cortice doctrinam, tantumdem & gignit honoris.

Tu tamen ut captes aliena volumina semper,
 Quæ tua sunt tantum adquisito jure tenendi,
 Aude aliquid majus (m): victuris inferere chartis
 Nomen, & extremis volvenda nepotibus olim
 Vindicet a tumulo quoque te membrana superstes.

Cur

(1) Meminit Athenæus cujusdam Calliphanis, qui cum esset infantiſſimus, tamen collectis apud se illustriorum Poëtarum carminibus, Poëtae famam aucupabatur.

(m) Libros scribere, & typis edere, argumentum doctrinae fallax, sed magni apud vulgus momenti, eoque Graeculis non conſemmandum.

Cur tu non facias, quod nunc sibi quisque licere
 Non dubitat? Tibi Praela gement Hollandica, si vis,
 Aeternosque dabunt ventura in saecula partus.
 Vix natum excipient te armamentaria Sacrae
 Palladis, atque inter pretiosa silentia tutus,
 Annosorum hominum pulchro sudore madentum
 Concilio intereris. Te callidus ambiet ultro
 Institor argutae mercis, doctisque columnis
 Praefiget longe spectandum, ubi marmore trunco
 Pasquinus riget (n), & Procerum mala gaudia turbat,
 Scommate Romano; & saevis metuendus Iambis.
 Te Juvenes avidi, Te post convivia crudus
 Parricius leget; & residis fastidia vinces,
 Pulvilloque comes fortasse cubabis eodem.
 Denique, quod summum est, quod spectat Gallius unum,
 Dum scribit toties (o), & opuscula computat annis,
 Aureolos multos, si DIs placet, inde parabis,
 Remque tuam tacite augebis. Quid quaeris? eodem
 Fomento geminum cordis sanabitur ulcus,
 Ambitio fervens, & habendi sacra cupido.

Omne

(n) Ad Pasquini forum frequentes sunt Bibliopolarum tabernae. Pasquino autem tribuuntur maledicta omnia, quae contra viros Principes per urbem diffeminantur.

(o) Notatum invenio ab auctore, quod iste Gallius (qui-
 cunque demum sit) cum numeraret vitae annos sexaginta, toti-
 dem ediderat diversi argumenti opuscula.

Omne tulit punctum, me Iudice, scriptor egenus;
Haec duo qui junxit, posuitque in foenore laudem.

Adnūis? at primum, quae sit magis apta placere,
Materiam sume, & paulisper temporis hujus
Ingenio indulge: certa est fiducia plausus,
Si critices aliquid promas (p). Tam mellea Siren
Nulla modo est, velut Historiae censura prioris,
Omnia quae miscet, tenebrisque involvit opacis.
Immane est quantum campo se jactet in isto,
Cui cor dulciculae prurit tentigine laudis:
Volvitur huc illuc, ut setas quaerat in ovo (q),
Licetorum similis, dubiam dum forte tabernam
Certatim excutiunt, & tela Ligustica quaerunt,
Furtivumque falem, aut vetita de incude Philippos.
(r) Nec si longa fides, multos servata per annos,
Commendet quiddam, & veluti inter sacra reponat,
Abstinet: annorum nulla est reverentia centum,
Quamquam Pragmatici laeso de Jure querantur;

Facta.

(p) *Ars critica nunc in maximo apud eruditos pretio. Hac immane quantum abutuntur Graeculi.*

(q) *Est adagium Italicum Carcare il pel nell' uovo.*

(r) *Reprehendit eorum temeritatem, qui, ut doctrinae famam aucupentur, rebus omnibus fidem abrogant, & illis etiam, quas Mortales plerique semper pro certis habuere: quod semi-docti aliqui hodie faciunt, & sane confidenter.*

Factaque, consensu majorum hucusque probata;
 Inter fabellas migrare jubentur aniles.
 Tene, o sancte Faber, prima vernasse Juventa (s),
 Quom Jessaea tibi sese Virguncula junxit?
 Omnes reclamant Tabulae: vetulum mihi nutritrix
 Descripsit puero, si rite audita recordor:
 Omnibus est eadem vox, & sententia concors,
 Jam tum (s) quom Solymis, metuunt qui Sabbata, pulsi,
 Nil refert; totum hoc non pendit Gallius hilum,
 Si desunt monumenta oculo subjecta fideli,
 Et palpanda manu. Communis opinio tanti
 Non est, ut satuo quae conjectura cerebro
 Nascitur. Hoc tu jure ullum adventasse negabis
 Hesperium ad Baetim Zebedaeo de patre natum,
 Ut multum obsistant, atque indignentur Iberi.
 Nec Constantini scabiem lustralibus undis
 Detersam, & Sacris permissam Regibus Urbem,
 Monstratumque Polo Vexillum, impune relinques.
 Cerdones isthaec credant, Puerique Fabrorum,
 Quisque locant humeros; omnis muliercula demum,

Quae

(s) Est qui neget S. Josephum fuisse aetate provectum, cum illi nupsit B. Virgo: sed qualescunque conjecturae minus persuadent, quam communis hominum opinio, qui semper aliter judicavere. Idem sentire videtur Poëta de S. Jacobi in Hispanias adventu, aliisque pluribus, quae infra enumerat.

(s) Jam inde ab excidio Urbis Hierosolymitanae, cum Judaei in exilium acti.

Quae nescit legere, & nulli est addicta Togato.
 Te ridere decet quidquid sibi finxit avorum
 Credula simplicitas. Hoc est modo scire aliquid plus
 Quam vulgus, supraque assurgere vèrtice toto.

Unde tamen tam multa simul deliria possum
 Consuere, ut non exiguus liber exeat? Audi (v).
 Sunt hodie libri, ut muliebria corpora, quae dum
 Conclavi neglecta suo, atque inculta morantur,
 Macra videbuntur, brevibusque simillima sardis.
 Fac rectis prodire eadem, spectanda per urbem;
 Non eadem forma est: nam cum peronibus altis
 Incubuerè pedes; quom tot redimicula frontem
 Aedificant, circum & vestis sinuosa tumescit,
 praegnantem artifici defendens turbine ventrem;
 Protinus augetur species, majorque videri,
 Atque alia: Ingentes una implet Faemina postes,
 Angustatque viam, magnos imitata Elephantos,
 Ant Orcam, per aquas vasta se mole ferentem.
 Non, quidquid libro adgeritur, liber est. Superabit
 Gallius haud Phaedrum, nimia farragine dempta,
 Defectisque supervacuis. Pars magna libelli,
 Protinus a titulo, cum Maecenate peribit,

Cujus

(v) Unde spissiores saepe fingantur libri, caetera inepti,
 & nullius succi.

Cujus in egregias laudes, atque inclyta eundum
 Facta Patrum plenis velis. Tum lector amicis
 Interpellandus verbis (x): *Extorsit Opellam*
Vir Princeps, & amicorum mihi maximus: Aegre
Invitusque fero donari luce: volentem
Perficere inceptum, limaque diutius uti,
Defecit tempus; graviores otia curae
Invidere: Piget properanti falce dolatum
Edere opus, subcivis quod scripsimus horis
Cessantes, tantum ut privata in sorte lateret:
Plura tamen sunt, quae nulli explorata Priorum,
Nequidquam tentata, & adhuc incognita, primus
Expedio dictis: In publica commoda nemo
Dexterius rem tractavit. Sic deinde sequere,
Grandia post habito adspargens promissa pudore.

Haec dum praefaris multus jam pagina fluxit
 Plurima per digitos. Quid postea? nec locus hic est
 Incipere. Anne tibi nolent impendere paucos
 Versiculos, qui nil renuunt laudare Poëtae,
 Dummodo clarescant, libroque legantur in omni?
 Hoc ergo spatium teneant Titus (y), Albius, Hirrus,
 Corvinusque tumens, adsentatorque Sabinus,

Nat-

(x) Haec, aut similia suis praefigere libris solent inepti scriptores.

(y) Triobolarium Poëtarum nomina.

Nattaque, Liboriusque ecfrons, similisque farinae
 Centum alii, Myopum pecus, & venalia corda.
 Omnes ingenium Auctoris mirentur & artem,
 Dicendique venustatem. Super omnia acutam
 Desinat in caudam quodyis Epigramma : Catenae
 Nectantur Fatis (z), juguletur Parca, rigescat
 Invidia, incolumes habeant nec saecula dentes,
 Si libet, ut tantae monumentum nobile mentis
 Nesciat interitum, nullaue aetate senescat.

Nec tibi non aliquot pagellas auferat Index,
 Qui citet emptorum nomen patriamque bonorum,
 Queis sua cudendo conlata est symbola libro.

Sic sensim tibi crescet opus, toroque libello
 Adpendix jam major erit. Sed & altera ceder
 Utilitas; quod Lector ubi pervenerit usque huc,
 Nil ultra volet. Ignarus quid deinde sequatur,
 Jam negat esse aliquid melius, juratque per aures
 Ipse suas, & Amalthaeae per cornua caprae,
 Haud aliam cervice Jovis potuisse Minervam
 Nascier, huic patrem divinum sinciput esse.

Sed quis pejerat hoc? Non Muratorius hercle (aa),
 Maffe-

(z) Haec aut similia ferme continent versiculi, quos inepti
 laudatores alienis libris praefigunt.

(aa) Eximii hujus temporis Litterati Ansonius Murato-
 rius,

Maffejusve, & Averanius, non qui Calepinum
 Restituit nuper. Plenissima pectora reſti,
 Nec tentanda dolis, nec conrumpenda favore,
 Secernunt aliena tuis: examine pendunt
 Aequo te, &, quanti ſis, taxant: mitte fabam albam
 Sperare immeritus: Non vincent mille Poëtae
 Cornicines dominae ſuffragia libera vocis.
 Proh facinus! raro quod jam natura noverca
 Dat tales animas, & corvis rarius albis.
 Nam modo cui tantum eſt animi? Per mutua certant
 Officia, inque vicem laudant, laudantur & Idem,
 Inter ſe tacito conjuncti foedere multi,
 Alterius faciem quamvis non viderit alter.
 Nominat Umbricium Memnon: Poſt tempore parvo
 Umbricii in libro ſit mentio Memnonis, & par
 Redditur. Ad ſuperos Juvenem Silvanus Ulyſſem (bb),
 Evehit; Etruſcum laudat Murranus Homerum.
 Sic aſinos videas coſtas conjungere coſtis,
 Officioque pari ſe ultro citroque fricare,

Quod

rius, Scipio Maffejus, Joſephus Averanius, Jacobus Faccio-
latus.

(bb) Horum alter edidit Tragoediam quae inſcribitur Ulyſſes
 aſcens: alter Homerum ex Graeca in Italicam lin-
 guam convertit: Ambo ſe mutuo, & ſatis liberaliter laudant.


Quod neuter faceret, fructus nisi mutuus esset.
ulterius ventum est. Tacitum sub laudibus unum
Littera adulatrix quondam gestare solebat:
Captabat timide tunc laus meritoria laudem,
Quosque dabat plausus, sponte excipiebat eosdem.
At nunc inceptis non dissimulanter agi res:
Hoc unum per amicitiae venerabile nomen
Postulat, a magno ambitiosus scriptor amico
Laudari: exclusus pudor est: it crebra reditque,
Semper & immeritas mendicat epistola laudes.
Quid faciat populus, qui nescit talia? credit
More suo; magnumque nefas, & morte piam
Esse putat, si forte horum neglexeris unum,
Quem magni facit, & stellis paene inserit alter.
Quod si aliquis, sola qui se virtute tuetur,
Qui neque mentiri vult, nec mendacia ferre,
Paullum intercedat, foedaeque ad scamna latrinae
Laudatum pariter laudatoremque releget;
Provocat utrumque, & populares nescius iras
In caput ipse suum arcessit. Plus creditur illis
Pluribus, & junctis pro se pugnantibus armis.
Invidus aut rudis est, qui fluctibus ire secundis
Respuit: Hunc tota premit eluvione fluentum.
Hoc est, quod plerique silent, mordentque labellum.

Quom

Quom levis excipitur tanto clamore Noriscus (cc),
 Quanto olim domito rediens Nisaeus ab Indo.
 Otia amant isti, Divom quae maxima dona,
 Totaque securo malunt dormire cadurco
 Sabbata, quam bellum emotis indicere vespis.
 Quo magis admiror fortes animi ac generosos,||
 Queis tolerabilius dulces amittere somnos,
 Quam libertatem. Vigilare ac semper in armis
 Vivere, sit quamquam non una timenda cicatrix,
 Pulchrum & honoratum est. Da tales, da modo Brutos,
 Jupiter, in re Palladia, qui ferre Tyrannos
 Imperiumque pati nolint, aut ambitioni
 Conjuratorum Capitem servire tacendo.

(cc) Insigniter ineptum esse oportet hunc Noriscum, cujus
 etiam meminit Poësa in Ser. 1. Quis lateat sub hoc nomine, di-
 vinare non ausim.





SERMO QUARTUS.

ET jam multa dedi, quæ Te servata disertum
Efficient alias si te excutis, ante Cicadas (a),
Aut etiam citius. Quid jam causabere post hæc,
Si me non audis? non te sudore perenni
Diffluere, aut placitos jubeo intermittere somnos,
Aegre & anhelare, aut pulmones perdere lepta
Tabe: Velis tantum: & peream, nisi ferre secundas
Doctorem in Regno, fieri merearis & Archon (b)
Protinus a Rullo. Non ingenio atque labore
Res hæc poscit agi, sed firmo pectore, & ore
Roboreo. Fuit hæc olim dementia, libros
Nocturna versare manu, versare diurna,
Multum olei, multum consumere nobiliorum
Spirituum, & studio canos demittere in uno.

At

(a) Id est ante aliam æstatem, quæ per cicadas significatur.

(b) Forte respexit Poëta ad archontas, de quibus Muratorius in sua litteraria Republica.

At nunc in facili labor est. Huc denique tota
 Evasit noviras, ut vix exercita gleba
 Det frugem immensam, atque omnis ferat omnia tellus.
 Erravere Patres, fateor; verumtamen illi
 Magna reliquerunt post se vestigia, molli
 Non tentanda pede. In mediis erroribus ausum
 Miror honoratum, & grandem prodentia mentem
 Peccata, ut bardo nec sic peccare liceret
 Conanti. Sed jam facta est impervia nulli
 Semita doctrinae: cunctos impune Togatos
 Provocat audaci cirratulus ore Cinaedus:
 Et calathos inter teretisque volumina fusi,
 Aemula Petrachae, tumidoque inimica Marino,
 Digerit egregios Poppea Poëtria versus.
 Attamen exspecto, si quem mihi det Chiabreram (c).
 Si quem Torquatum, jam tot foecunda Poëtis
 Haec aetas: saltem Filicæia, aut denuo (d) fidus
 Existat Pastor. Nam quid Magnatibus illis
 Haecenus obponat? Bertoldum credo (e). Sed isthaec
 Missa face: Eximii Frugonius (f), & Barufaldus,

Rhe-

(c) *Insignes Poëtae saeculi superioris.*

(d) *Titulus Fabulae Pastoralis apud Italos notissima.*

(e) *Ita inscribitur Poëma nuper Bononiae editum, & à multis praeclaris viris conjuncto studio concinnatum.*

(f) *Poetae hujus temporis spectatissimi.*

Rhedius, & Gregis Arcadici qui praesidet arvis
 Philacidas (g), atque his non Jortiguerrius impar:
 Adde Metaftasium, grandi qui carmine scenas
 Personat Italicas: Adde hunc, cui maxima laurum
 Roma dedit (h): sed nec talem te fingere nuper
 Institui, modici nec res est ista laboris:
 Hos longe sequere, & vestigia pronus adora.
 Altera Doctorum est, & maxima turba, superbam
 Quae facit aetatem, doctrinae infesta priori,
 Omnia contemnens, nisi se, sacclumque Leonis.
 His ego Te comitem adscribo, ni obsistis, & unum
 De multis facio, Pindi qui Fata gubernant.

Angeris, ut video, infelix: Me ne, inquis, inanem
 Sumere virtutis larvam, virtute relicta?
 Decipiam multos, non me: sub imagine falsa
 Cognitus ipse mihi absolvar, me iudice, numquam,
 Socordemque animum semper mens conscia fraudis
 Arguet. Ah! miseror; nec qua ratione revellam
 Hunc tibi scirpiculum invenio. Vis denique verum
 Eloquar, abjectis phaleris? Sed pronus in aurem

Hoc

(g) *Franciscus Lorenzinius Arcadiae custos generalis, Arcadico nomine Philacidas.*

(h) *Eques Bernardinus Perfetti Senensis in Capitolio laurea Apollinari donatus anno 1725.*

Hoc tibi committo, & cave ne cui dixeris unquam.
 Id cruciat quoque me : ut multum mihi blandiar, haeret
 Scrupulus hic cordi infixus ; nam sentio, quam sim
 Exiguus, famaue minor, si nominis usquam est
 Umbra mei. Quantum est ideo, quod lusimus orsu
 In primo Satyrae, postrema hac parte recanto
 Ex animo ; positaque Thraasonis imagine, reddo
 Me mihi, & antiquum sisto tibi laetus amicum.

Novi artes, novi simulandi nomina, quae me
 Edocuit Rullus longo jam cognitus usu :
 At vero esse aliquem, qui det sibi verba, sibi que
 Callidus imponat ; quippe id mirabile dictu est,
 Nec scio, qui fieri possit ; quamquam mihi Rullus
 Cognitus, intentoque diu observatus ocello.
 Atqui hoc Rullus habet, nimium sibi credulus ipsi,
 Seque met, arcanum quod non scrutabile, fallens.
 Nam postquam semel inquit, *Ego sum magnus Apollo,*
 Id sancte credit, nec dicere sacramentum
 Ambigit. Anne Jocos ? quid nuper dixerit audi (i).
 Nescio quis minime simplex, & mentis iniquae,
 Ex Rullo quaerit : num quem toto Orbe putaret
 Esse virum, tanta qui cognitione maderet,

Et

(i) Duo quae hic narrantur, non sunt auctoris commenta,
 sed re ipsa contigisse audio.

Et secum ingenio posset certare. Quid ille?
 Componit primum se, cunctatusque parumper.
 (Verum, ut habet, narro) : Fortasse, ait, unus & alter,
 Haud equidem abnuerim, re plus excellit in una :
 At peream, si quis felicius attingit omnes,
 Et genere ex omni studiorum Arior usquam est.
 Sic ille absque joco. Anne aliquid majoris abollae?
 Non speras : tamen est. Aderant certare parati
 Confessu in magno multi varique cuculli,
 Ut solet. Exsistunt Pueri jam diribitores,
 Sparguntur toto lata exemplaria circo.
 Rullus in his chartam evolvit : tum fixus in uno
 Obtutu, caperat frontem, nasumque subinde
 Censorem ducens, Physicae capita omnia lustrat.
 Vitali (k) nasci muscas referebat ab ovo
 Pagina. Rullus ad haec vocem non continet ; at se
 In latus obvertens, Etiam ne, ait, hoc recoqui, quod
 Pridem ego composui, pro re non pauca locutus,
 Judicioque dato ? Mirum id, minimeque ferendum
 Quippe videbatur stulto, quod staret, ut ante
 Causa vetus, Rullo Disceptatore dirempta.
 Jamne vides, quantum placeat sibi ? quam sibi plaudent ?

Qua-

(k) Titulus quaestionis, quae in schola Peripatetica tra-
 ctari solet.

Qualem se fingat ? Felix, qui gaudia potat
 Omnia doctrinae, nulla mercede soluta.
 Sic amens alter, sua quem dementia fecit
 Induperatorem, Carolo (1) non invidet auri
 Pallorem, & Chlamydem, aut alacres in bella Phalanges,
 Nec famulantem Orbem, & quantum est, quod Caesaris auget
 Fortunam: gaudet lacris in vestibus aequae,
 Aut etiam plus, ut curas qui nescit amicas
 Imperii, & circum regalia Tecta volantes.
 Hinc nitor in cute perpetuus, frontisque serenae
 Illecebrae, blandusque oculorum languor, & udus
 Ambrosia vultus, spirans convivium Divum:
 Hinc Veneres, ultraque diem producta Juventus.
 Nam quid maceret hunc, qui secum talia gestat
 Semina laetitiae? Nulla est injuria, quam non
 Diluat extemplo verae mens conscia laudis.
 Obiice pauperiem: nemo est locupletior illo,
 Qui tantum virtutis habet sub pectore censum:
 Invideant illi Reges, non Regibus ille.
 At genus obscurum: de mandra ad pulpita venit,
 Adsumfitque Togam: natus de matre Gigantum; (m)

Quid

(1) Carolo nimirum Sexto Romanorum Imperatori, cujus tempore haec scripta sunt.

(m) Ac si diceret filius Terrae, id quod abjectissimam conditionem significat.

Quid tum? nobilitas sola est atque unica virtus.
 Hinc & amicitiam, & commercia Patriciorum
 Usque colit, dominis audax adcumbere mensis,
 Et matronales jugulare impune Cathedras:
 Quomque domi sit curta penus, cicerisque catillus
 Ficilis, & rapae, gratissima Pythagoreis
 Fercula, vix reparent jejuni tormina ventris;
 Se gerit externe pro Lydo Rege, Midaque, (n)
 Cujus habet tantum auriculas. Huic forte mederi
 Instituas: Age: Nonne vides, mi Rulle, quod istam
 Non facis ad Spartam? quod multo saepius erras,
 Quam loqueris, nec scis quid distet nasus ab ore?
 Quos recitas versus, nollet fecisse Puellus,
 Qui tremit ad scuticam: Populus te sibilat, omnes
 Traducunt, imi ac summi, juvenesque senesque.
 Invidia est, inquit. Fortasse erit unus & alter
 Lividus; anne omnes? quis non ignobilis autem,
 Quis te aliquo ponit numero? Quis cogitat an sis
 Albus an ater homo? Multis tribuuntur honores,
 Non tibi: cede Deo: falsam miser exsue mentem.
 Invidia est. Sed quid tandem invideant Tibi, nullus
 Quem commendat honor, tenui, rerum omnium egeno,

In-

(n) Notissima est fabula de Mida Rege, cui Apollo asinas auriculas indidisse dicitur.

Inlustres Heroum Animae, rectique tenaces,

Ventidius, Rufus, Peribonius? Et tamen illi,

Illi etiam tua concordēs deliria rident.

Invidia est, iterum ingeminat, quae regnat, & ipsos

Transvertit saepe Heroes. Tota invidet illi

Gens hominum: Cithisum dumtaxat & excipe Gallum:

Nempe illae pecudes, cerebri quibus uncia non est,

Rulli admirantur crepitus, & stercore lambunt.

Ulterius quoque prorupit: Flocci facio, (o) inquit;

Qui me cumque facit flocci. Num despicias omnes?

Despicio, si vis, & eodem ponimus illos,

Quo me illi numero, & cubito metimur eodem.

Quid facias? actum est: adeo latet ulcus, & alto

Corde sedet, vincitque manus, artemque medentum.

Pharmaca nulla juvant, quamvis Enidauria; non quae

Vulnus adularur lenti dulcedine succi.

Non ea, quae toros faciunt stridere molares

Horribili sale, & innocuum mordere labellum.

Helleborum restat, succo si forte potente

Reddatur menti integritas, & pristina virtus,

Interea totum evolvi, ni me omnia fallunt,

Nescius arcanum, quod pridem scire volebam,

Ec-

(o) *Id Graeculis familiariissimum, contemnere à quibus con-*
temni se videns.

Ecquid non cernis? Summa est Furere. At sibi Rullus
 Hoc habeat: non invideo: & si quem juyat ultro
 Desipere, & cerebrum pro dulci errore pacisci.
 Hoc ego non faciam: quid Tu? Sapis, & sapere usque,
 Credo, voles. Igitur posthac ridebimus ambo
 Unanimes (quid enim superest, medicamina quando
 Omnia dispereunt?) hilarem, & risum dare natam
 Rulli stultitiam. Quantum ad rem pertinet, audi
 Quid demum statuam, (p) Nova, quae crebescere coepit,
 Semita doctrinae, solis est pervia ventis,
 Quove pedem figas nihil est; planissima quamquam,
 Et brevis, & lenociniis sit confita multis,
 Hac me nemo trahet sanum. Mendacia deme,
 Non fugiam. Melior nunc de Permesside sensus,
 Purius eloquium, & primis de fontibus haustum:
 Sed nimis a vitio discessum. Inrepserrat ingens
 Fastus ab Urbano (q), & damnosa licentia fandi,
 Non ea quae ratio, sed quae mens percita ferret;
 Ibat & excussis resonans Oratio fraenis.
 Laudo, luxuries quod jam est compressa pudenter,

Conse-

(p) Quid demum sentiat Poëta de litteratura, quam reformatam vocant.

(q) Nempe sub initium saeculi superioris, quo tempore regnare coepit Urbanus VIII.

Confeditque furor. Sed ut est contermina culpae
 Culpa alia, & tenui distant contraria fine;
 In vitium duxit vitii fuga. Sola probatur
 Jam phthisis, & macies in carmine, pauperiesque;
 Optimus ille autem, quem non reprehendere possis.
 Peccat idem qui nil audet, nimis alta petenti.
 Est igitur quod utrinque probem reprobemque: Tumores
 Nolo procelloſos, & arenam radere nolo;
 Illis adſtipulor, medio qui tramite pergunt,
 Et decus hinc, illinc animos & lumina ſumunt.

Nec mihi ſi Petrarcha ſapit, jam Zappius ivit (r)
 Ad Corvos: laudo hunc, magis illum. Pluribus itur
 Diverſisque viis ad metam ſcilicet unam;
 Sed bene qui currit, palmam rapit. Odi ego vanum
 Tironem, ſua qui vult tantum Idola Sabaco
 Ture vaporari, & taxat diverſa ſequentes,
 Suſpicor & multos nigram praeſigere theta
 Non temere eximilis auctoribus; & ſua virtus
 Forte nocet miſeris. Quid in illo carmine tandem
 Diſplicuit? Summum eſt, & non imitabile lippis.
 Hoc dignum facit opprobriis, & ſtigmatæ ſaevo.
 Huccine flagitii? Quis acerbæ temperet irae,

Stran-

(r) Joannes Baptiſta Zappius Poëta nobiliſſimus, qui multis
 ea tantum cauſa diſplicet, quod vix aliquid ſimile habeat Pe-
 trarchae.

Strangulet aut medio turpissima verba palato,
Id reputans? Quanto melius, qui non cito librum
Judicat, atque aliquid semper laudare laborat,
Mitis Aristarchus! vix est de millibus unus,
Si Burri excipias, fatuique volumina Crispi,
Quem totum damnare queas. Bona plurima subsunt
Interdum, intuitu quae non deprenderis uno.

Sed neque me comitem speret (s), qui lintea ventis
Omnibus obvertit, nunc huc, nunc vividus illuc
Flectere iter, grandique vorans studia omnia voto.
Omnia quis didicit? Periturae angustia mentis,
Vitae summa brevis, jamque instans forcipe Cloto,
Moliri tam multa vetat. Jam temporis hujus
Quantula pars curis vacat? Alea, somnus, amici
Hinc multum demunt, Sperabimus inde per omnem
Ire facultatem egregie, & collecta tenere
Craniolo hoc, laetos facerent quae sparsa trecentos?
Non credam. Sed enim dum libas plurima cursim,
Undique defectis, mistisque sine ordine rerum
Fragmentis, mens obruitur, medioque fit ingens
In capite Artocreas, rudis indigestaque massa,
Quanta potest facere audacem, non hercule doctum.
Votum immane, audax, & dorso sarcina major,

Om-

(s) *Carpuntur, nec immerito, qui omnigenam scientiam affectant.*

Omnia complecti. Nimum qui guttura pandit,
 Nil tenet, Aesopi quod prodidit ante Molossus.
 Hinc mihi suspectus Medicus, qui carmina pangit,
 Causidicusque Geometres. Tu contrahe vela,
 Et multum studeas, non multis. Quis pudor, illud
Nescio honoratum constanti promere voce,
 Quom sit opus? Malo hoc, quam dici *nescit*; &, omni
 Dum loquor in causa, turpes audire cachinnos.
 Unum age, sed totus; sed & hoc cunctanter, & illa
 Orbita Te ducat, quam signavere priores.
 Nec tibi tam prudens quisquam persuadeat auctor
 Linquere iter notum, & compendia caeca viarum
 Quaerere: Festinans ad metam serius ibis.

Primo deinde loco figas, quod nil sine magno
 Vita labore dedit Mortalibus. Unicus ille (t),
 Quem sponse implevit tacito Sapientia lapsu
 Stertentem. Ad Vigiles ea nunc descendit Alumnos.
 Qui tremere, & sudare queant, totosque Decembres
 Abstineant vino, & longo in pallore senescant.
 Quo magis attonitus tantam subcrescere in horas
 Audio Doctorum segetem, citiusque sonantes
 Saxorum pluvias, & Mulas parturientes
 Glutirem, & quaecumque redux (v) ab Athlantide narrat.
 Nam

(t) Salomonem intellige.

(v) Qui ab Indiis ad nos revertuntur, mirabilia multa,
 eaque incredibilia narrare solent.


Nam modo quot numeres, queis foedum & turpe jacere
 Desidia? quando gravior socordia Terris
 Incubuit? quis jam majora volumina versat?
 Quis vomitam ex libris duxit, putremque salivam?
 Expende ætatis mores: Vix prima Juventus
 Evalit ferulam, longumque valere jubetur
 Cum grege Musarum jam fastiditus Apollo;
 Et diversa placent (x). Tortum quatit ille flagellum
 Cum sonitu, aut Frisios agitans ad fraena Jugales
 Automedon novus, undantem terit axe citato
 Flaminiam, auratoque urget temone Popellum.
 Ille diem solidum cavea traducit in tuda,
 Expositum gaudens talis quassare fritillum,
 Odrysios inter latices, calidumque cacavum,
 Et gerras ferere, absentum nec parcere famae.
 Maxima pars longo misere torquetur amore,
 Et dolet assidue quod tot suspiria, quod tot
 Non valeant duram placare Amaryllida luctus,
 Cujus ab arbitrio vivit, moriturque. Videbis
 Hunc paene exanimem surda pendere fenestra;
 Illum, cui fulget modio saturata farinae
 Caesaries, multo & nasos invitat amomo,

ire

(x). Ea commemorat, quibus maxime delectantur Romani
 Juvenes, praesertim ex ordine Patricio.

Ire redire viam sublustri vespere eandem,
Figere & obliquo crudeles lumine postes:
Omnes nil agere. Inde dies labuntur inertes;
Nec melius noctes; inolevit publica quando
Consuetudo vices invertere, luce cubare
Mollibus in stratis, luna impendente beatos
Congressus colere, & lusus producere, donec
Humida subducat tardus Sarraca Bootes.
Publica quom sint haec, tamen aurea volvitur aetas;
Quique eadem faciunt, hedera donantur amica,
Inflatisque crepant buccis, & pulpita frangunt.
Quid facit hos animos? Scio: Tres quatuorve libelli
Perlecti ructus inter post prandia cursim.
Tam parvo prostat nostris doctrina Calendis.
Sed Tu, cui laeva sub mamma nobile quiddam
Palpitat, haec vilis quam sit Sapientia sentis,
Et mecum perges alio decurrere campo.





SERMO QUINTUS.

Mens erat Arcadio (a) suspendere spicula trunco,
 Spicula, victoremque arcum, satiataque multo
 Vulnere (b), adhuc tepidis & tincta cruoribus arma,
 Optime Salmori. Sed inermi vivere dextra
 Non sinit Etrusco (c) veniens e litore clamor
 Asperior solito: quin inde emissâ sagitta,
 Quamquam incerta volat, solas & verberat auras,
 Intento monet esse animo, torquendaque rursum
 Stringere tela jubet. Nec me discedere campo
 Adspiciet quisquam, dignus modo provocet hostis,
 Quemque pudor non sit facili vicisse triumpho.
 En adsum: nec enim totam consumsimus iram,
 Nec pharetra exhausta est; & adhuc mihi numine servant
 Corda; Lycambaei superest quoque portio fellis

In

(a) Forte auctor inter Arcades Pastores adscriptus est.

(b) Graeculorum nationem ab se superioribus sermonibus profligatam intelligit.

(c) E Florentinis aliqui sermones in malam partem interpretati, fremore coeperant contra auctorem.

In promptu. Sed quem petimus? Cesellius hercle, (d)
 Indignum caput, aonio quod concidat ictu,
 Me numquam trahet in pugnam; convicia quamvis
 Multa vomat: fiet nec me feriente superbus.
 Offstrago melius baculo mansuescere posset
 Scurra procax, sacris non castigandus iambis.
 Scilicet ut curem hunc, qui paucula verba latine
 Reddere non valuit? Quid? quod fanaticus iste
 Mecum non agit? & satyras ulturus acutas,
 IncurSAT quoscumque potest, primosque laceffit,
 Ut fors obtulerit, multum & despumat in illos,
 Ira amens caeca, rabidoque simillimus angui?
 At miser insanis lunam latratibus urget,
 Nec grandes animas, magno jam nomine tutas (e),
 Percutiant voces immane rudentis aselli.
 Ille etiam de me praeclare sentit; amicus
 Nec mihi blandiri plus posset: carmina quando
 Talibus adtribuit nostra, & sibi fingit in illis

Secta-

(d) Sub hoc nomine editum est carmen Italicum maxime contumeliosum, non tam contra L. Sectanum, quam contra Jesuitas.

(e) Duos praesertim Jesuitas, eosque spectatissimos, immixtis conviciis proscindit Cesellius, quod eos esse crederet sermonum auctores.

Sectanum ignotum. Quo gratus honore vicissim
 Illi ego nec famam renuo, nec fine carentem
 Vitam elargiri. Madeat Cefellius ergo
 Additus huc, longum & nostro cum carmine vivat :
 Seraque posteritas nomen balatronis inepti
 Audiat. Hoc a me miser impetraverit unum
 Carmine pro tusco, caecis, si forte, probando,
 Perque vias urbis, vetula nubente, canendo
 Discordem ad cytharam. Sed nil jam postulet ultra,
 Nec responsa perat. Sperni sua jurgia, seque
 Sentiat, & doleat. Nam quid, si denique vellem
 Respondere queam? quom, praeter rancida quaedam,
 Spurcitiis audire meras (f), inhonestaque cogor
 Propudia, ecfrontes factura rubescere moechas ;
 Quaelibet & foedis stupratur pagina verbis.
 His me respondere nefas; quae scilicet usus
 Urbanus vetat, & pudor, & reverentia. Vos o
 Linguaces servi, Lictores, Furciferique,
 Cauponesque mali, Lixae, Lanii, Cerdones,
 Venales Mimi, & Praedones sandapilarum,
 Mulorumque duces, carrucarumque magistri,
 Quique tabernarum semper de rore madetis,

Vos

(f) *Re vera illud Cefellii carmen plus obscenitatis habet,
 quam leporis.*

E

Vos illi, novistis enim, per mutua pro me
Ferte vicem fermone pari; dominoque priori
Hoc agite ut redeant tituli, quos perdidit omnes;
Et sua spurciloquo diſteria reddere vati.

Post haec erumpat furioſius, & ſine lege
Saeviat, aut proſa aut numeris, impune licebit;
Ut multum exclamet, vocemque minaciter inſlet
Faucibus ex imis, media inter verba reſolvens
Municipes ſtatus; Faciendaque, factaque eodem
Metiri cubito certum eſt. Obprobria ſurdus
Qualiſcumque feram: donec fermone latino
Exiſtat quiddam meliori numine cuſum.

Sin minus, immundae damnabimus omnia ſellae:
Atque hunc poſtremo Ceſellius ibit in uſum.

Quanto rectius hic (g), latio qui ſcripta colore
Divulgare timet, nonum & maturat in annum?

Conſilium laudo artificis. Maledicta pudenti

Ignorſco miſerans: iratum nec tamen odi,

Haecenus. Id miror: ſtomachi quae cauſa? quid illi

Diſplicuit? tanti ne fuit dementia Rulli?

Dic, o quicumque es, perituri carminis auſtor,

(Comis & impavidus namque inſto, & utroque paratus,

Seu

(g) Reliquus ſermo eſt ad Anonymum, à quo ſuſpicio ali-
quid latini ſcriptum fuiſſe, & publice recitatum contra Jeſui-
tas, ſed deinde ſuppreſſum.

Seu certare odiis posthac, seu jungere dextram,
 Quid tibi cum Rullo? quid cum bucconibus illis,
 Quorum ego lustravi latebras, & facta momordi?
 Te ne ego pingebam nolens (b)? Non, arbitror, istuc
 De te ultro dices; coram & tortore negares,
 Si, quid habes cordis. Quorsum ergo clamor & irae?
 At strident multi. Si de grege curcilionum,
 Vox quibus in censu est, sola & mendacia profunt:
 Hoc volui. Mensam consulto sartor amicam
 Percutit, ut saliens prodatur se tinnula forfex.
 Sin alii: immerito flagrant, feriuntque suo se
 Judicio. Esse aliquos verae virtutis alumnos (i),
 Qui grajo de fonte bibant; qui mucida saxa
 Non frustra, & senio detrita numismata versent;
 Intima qui penetrent naturae arcana, Mathesi
 Auspice; qui critices taeda nitantur ad astra,
 Scimus: & hanc illis laurum concedimus ultro,
 Gratamurque datam, & taciti veneramur adeptos.
 Illis irascor, vacuo qui cortice laeti
 Talia praetendunt; pluma vitulantur & alba

Inte-

(b) Id nempe ille de se nimis ingenue fatebatur, quae eadem
 Graculorum descriptio non posset in alios cadere.

(i) Significat auctor, quid de bonis litteris, virisque lis-
 teratis ipse sentiat.

Interius corvi, aut majori nomine galli (k)
 Larvati heroës, nil verae laudis habentes.
 Haec veteratorum pigmenta, hunc denique fucum
 Odi ego, & infector. Nec jam lectore benigno
 Est opus; est aequae mentis, minimeque supino,
 Sinceris nolit qui crustam inducere. Sed ne
 Sit locus errori, nostram tandem adcipe mentem.
 Nam juvat ingenuos animi depromere sensus,
 Et non ambigue dictis lucem addere. Posthac,
 Quos designarim, indicii cognoscere certis
 Fas erit: & satyram capies interprete nullo.

Putidius nihil est illis (l). Si cetera desint,
 Asperiore supercilio, rugaque minaci
 Adcusant sese. Sed quanta cucurbita collo
 Haereat, ostendit vocalis Graeculus, & se
 Prodit hians tantum. Quam multa negotia! quales
 Deblaterat curas, nullis Poscentibus! *Horam*
Respirare nefas. Quid enim? *Hinc formosa puella*
Sacris induitur vittis, hinc altera nubis.
Carmen utrique paro, quid vis? debetur utrique:
Nolentem vicere preces. Sed pressius urget,

Quod

(k) *Italice Gallinacci.*

(l) *Jam aliqua afferuntur indicia, unde Graeculi, de quibus auctor, certo dignosci possint.*

Quod jubeor quaedam Zetetica (m) cernere cursum,
Judiciumque dare. Et nuper liber editus, a me
Censuram expectat. Redeuntia sabbata post haec,
Et scribenda frequens de rebus epistola nostris,
Paens adimunt animam. Quis talia scire laborat?
Sed fucum faciunt: ideoque alpha ardelionum
Nusquam non recitat cunctis, atque obgerit ultro.
Quid si doctum aliquid mediis sermonibus, ut fit,
Incidat? Heic partes Rhadamanthi adsumit & urnam,
Ac tripode e sacro judex oracula rumpit.
Astronomus non est: caeli tamen impiger orbes
Adgreditur, solisque vias, & cornua lunae.
Quomque parallaxin, quantum pote, dixerit, actum est:
Jam Siculo mundum non invidet armillatum (n),
Non est Caufidicus, Medicorum aut unus: at illi
Languidius causas, morborum & nomina tractant.
Ecquid Musicus est? vario de chromate velox
Dicere? Ne multis. Si duceris ore loquentis,
Quidlibet est: Medicus, Pictor, generosus Equiso,
Navita, Venator, Miles, Faber, Archimagirus.
Haec leviora tamen, Tunc prae Nili cataractis

Pere

(m) Schola Zetetica divinarum atque humanarum rerum scientiam profitebatur, eaque creditur a Mose instituta.

(n) Sphaeram armillarem ab Archimede Syracusio inventam.

Perstrepit, & spissam calido jactit ore salivam,
 Quom divina movet. Timide quae tangit Aquinas,
 Et quae barbati trepidant versare magistri,
 Expedit ut digitos. Tanti est componere litem
 Ac spueret: *Heus tu*, inquit, *labium compeſce*, Molina (o):
Gratia Lemosio victrix aetere triumphat.

Atque ea saepe audis, quae non deferre Minervae (p)
 Relligio est. Si quis forte audeat hiscere contra,
 Concinit ad lapidem, contraque tonitrua pedir.
 Offeus ingenio, conchas atque ostrea vincens
 Duritie mentis, citius, quam dicta recantet,
 Amittat corium; &, fracto quoque crure, resistat
 Indocilis vinci: fortasse & bestia calces
 Pro stimulo dabit. Est, qui solvit labra cachinnis,
 Si quando haeret aqua; & simulans immane tacendi
 Propositum, quom jam nec vox nec verba sequuntur
 Conanti, litem risu concludit equino.

Sed liber in pluteo. Visa se Graeculus esca.
 Non tenet: in titulum ruit Ocyus, atque voraci

Fu-

(o) Ludovicus Molina, & Thomas de Lemos, duo praestantissimi Theologi, ac satis noti in celebri controversia de auxiliis divinae Gratiae.

(p) Quae videlicet ad Tribunal S. Inquisitionis deferenda sunt. Convenire solent Cardinales Inquisitores in aedes PP. Dominicanorum, quae à Minerva nuncupantur.

Lumine obit totum. Sed nondum pagina versa est,
 Jam crispat buccas, jam nasum ducit aduncum:
 Jejunat, modo visus edax, alioque reflectit.
 Jam saturos oculos. Unde haec fastidia, quaeris,
 Tam subita? In causa est Sadoleto serior annus (q),
 Qui jacet ad calcem. *Meliora opsonia, sodes,*
Porrige, ait, si me pulchre gratularier optas.
 Ut lubet: en alius codex. *Hanc tu mihi pestem?*
 Tolle, rogo, ex oculis; babeatque Salaris, aut qui
 E lacera fingunt ridenda sigilla papyro.
 Cur hoc tam subito? num pridem cognitus auctor?
 Nunc primum tetigit. Sed in ipsa fronte repertum
 Nescio quod Jesu nomen facit esse pigendum (r).
 Haec summa est culpa, damnari ut debeat insons,
 Indicta causa. Jam quiddam existat ab illo
 Tempore, Borbonio cessit quom Roma furenti (s),
 Altaque sacrilegis patuerunt Tempia caballis.
 Quidquid id est, summum, admirabile, Caelicolarum
 Symposio dignum est. Olivae mille oscula libat

Mem-

(q) *Causa est quod sit impressus post saeculum XVI, quo floruit Sadoletus.*

(r) *Græculo displicet liber eo tantum nomine, quod auctorem praeferat Jesuitam.*

(s) *Saeculo XVI. contigit miserrima Romanae urbis clades ac direptio, duce & auctore Borbonio.*

Membranae, rorem ex oculis demittit amicis,
 Inrequierus agens nimia tentigine clunes,
 Nunc age : Scriptorum mutantur nomina tantum,
 Lemenis (t) si quid recitas; praemittito Bembum;
 Bembi si quid habes; illum mentire priorem.
 Quid fiet? Mera facta cano (v). Tolleitur ad astra
 Junior immodico plausu: nec tota verustas
 Proteget a fannis & amaro scommate Bembum.

Haec ego mansuere ut videam? me parcere flagris
 Sorte datis? Malo gelidas forbere cicuras,
 Quam fieri stipes. Doleat, fremat, atque labellum
 Dente premat, merito quisquis sub verbere livet:
 Nec sileat, quantisque potest ululatibus auras
 Impleat. Haud parcam. Durum est, quod vapulat, illi?
 Ast aliis durum inludi. Si plangere non vult,
 Idque cupit, ferulam scapulis arcere sonantem;
 Quur non insanam discit compescere linguam,
 Seque suam intra pelliculam tenuisse pudenter,
 Consilia in melius vertens? Non omnibus omnia
 Improbus est aequè invisus. Metuendus adulter
 Zelotypis tantum; sed & his quæ contigit uxor

Foeda

(t) *Franciscus Lemenes egregius proxima memoria Poëta.*

(v) *Haud raro accidit, dissimulatis Scriptorum nominibus, Graculum ballucinari surpner, & de scriptis perperam judicare.*

Foeda parum, Locuples rimet uncum furis & odit,
 Prodigus heredem; naras contristat Avarus;
 Solos Delator fontes: Falsarius omnes,
 Cui non indignum est, bardum stolidumque putari?
 Atqui hoc de nobis sentit, qui imponere certat
 Graeculus, & nostra se credulitate tuetur,
 At, si cui dederunt longum bona numina nasum,
 Imponi sibi non vult. Artes bambalionum
 Ridet, & ignavo caput ecfert nobile vulgo,
 Et, cuicumque tepent generoso sanguine venae,
 Devovet, & merito, hos, Tussim, laterumque dolorem,
 Et cancrum, & scabiem, nodosae & vincla podagrae,
 Pallentemque gonorrhoeam, tumidasque marifcas,
 Herniam, & esuriem, & cimices, & carceris umbram,
 Et si quid miserabilius, quis perferat aequae;
 Nemo impostores. Idem calor incitat omnes,
 Mens eadem: haec abolenda hominum contagia; & igni
 Privandos & aqua, si fas, & lumine solis;
 Rem tractandam armis, & aperto Marte gerundam,
 Et quamquam in mediam descendi solus arenam,
 Solus & incursum glomeratae huc usque phalangis
 Sustineo: mecum meditantur foedera multi
 Jungere; pugnantique favent clamore secundo (x)

Inte-

(x) Adeo secundo, ut jam quinque diversis in locis edidi
 sint hi sermones, & ubique divenditi magno pretio.

Interea, & laeto nobis acroamate plaudunt.

Attamen haec tu monstra bonus mitisque patronus
Defendenda putas? Cave, sis, defendere causam

Ne videre tuam. Sed nondum ponimus isto

Te numero; & de te melior sententia surgit.

Suspikor invitum, & multis gannitibus actum

Adposuisse manum tabulae; factique pigere

Internis actum stimulis. Defendere malo,

Quam cito damnare. Et vetus est fortasse simulas,

Quae te praecipitem in saevos inmisit iamhos,

Recto posthabito: vetus est injuria. Nam quur

Sectano infensus, tantum baccharis in illos, (y)

Una quibus cura est Pietatis jura tueri,

Virtutisque viam docili monstrare Juventae:

Qui semper vigilant in publica commoda: qui te

Erudiere diu, & talem finxere docendo?

Quur transfers iram? Pullo Sectanus amictu

Scilicet incedit, quadramque adrodit eandem.

Quid si deciperis? Quid agam, quo litore vivam,

Quae me lana tegat, num pulla, an candida, qui sim,

Non facile invenies, (z) Cereris si lampade quaeras :

Quid-

(y) Jesuitas designare videtur.

(z) Nescio quam verè haec dicta sint. Quis sit L. Sectanus,

res

Quidquid fama canat; quidquid vulgaverit, acta
 Publica quae perfert, mentiri adfuerat papyrus,
 Quem me cumque tamen fingas: num vertere in omnes
 Unius culpam decuit? Tu bella movere
 Tot Patribus simul, & tantum irritare Senatum
 Nil metuis? Toto nec corpore contremuisti,
 Nec coma dirigit, nec vox tibi faucibus haesit,
 Nec periere intus braccæ; quom plena furoris
 Carmina ructares, tot circumstantibus illic
 Testibus? O miserum! si paullo grandior esses!
 Sed tua te macies a magno protegit hoste.
 Agnosce hoc saltem, quod saxum immobile pulsas,
 Decoquis & vocem. Quos Reges atque Terrarchæ
 Consiliis adhibent, summo & dignantur honore,
 Quippe movebuntur, si Rana infensa coaxet,
 Vanaque limoso mittat convicia fundo.

Sed tandem, ambitio an virtus hoc suadeat illis (aa)
 Consilium, miror generosa silentia, & idem
 Indignor. Vellent si quando obvertere frontem,
 Et contra audaces sancto se jure tueri;

Ob-

res est jam multis comperta. Illud aequè compertum, non esse ullum ex iis, quos Florentinus scriptor incescit, nihilque eum minus cogitasse, quam quemquam Florentinorum carpere.

(aa) *Videtur reprehendere Jesuitas, quod tam multis libere obloquentibus numquam, aut raro, aut certe non pari libertate respondeant.*

Obtrectatorum populus decreveret & frons,
 Et fierent mutae, post prima pericla, cicadae,
 Nunc autem cui non haec surda modestia linguam
 Exacuit? cui non animos dat mortua virtus?
 Quem metus instantis virgae? quem poena coërcet
 Descensura? Ferit, gingivam quisquis inermem
 Non habet. Excussi prohibent si rodere dentes,
 Latratur. Bonus est, sola & virtute movetur
 Harpocrates. Chartae volitant impune loquaces:
 Rari conventus, rarae sine scommate mensae,
 Quodque magis coquit, implumes, etiamque recentes
 A scamno & scutica, hoc audent: qui nec tria norunt
 Stesichori (bb), quibus & non tangit poenula talos,
 Nulla ne projecto fraena injicienda furori?
 Si cessant illi, palmae melioris amore,
 Quorum res agitur: saltem intercedat amicus,
 Et si quis pulchro est qui delectetur honesto,
 Juris amans, rectique tenax; seque obferat ultro
 Aequi adfertorem, defensoreque Tacentum,
 Causa bona est; & qua possit sibi quisque placere,
 Hoc ego consilio, & stimulis praestantibus actus,
 Jam semel ad partes veni; turbamque repressi

Exul.

(bb) Proverbium de vehementer indocto & imperito dici solitum. Tria Stesichori sunt, Strophe, Antistrophe, Epodus.

Exultantem animis, nec quid jam tale timentem;
Majoresque pati docui, & non tollere cristas.

Illa quidem spumas agit ore, & sidera pulsat
Stridore ingenti. Sed vox est ista gementum,
Haesuram perhibens alte subiisse sagittam:

Quo laetor magis, & pulchro mihi gratulor ictu.

At tandem siluisse volent: pruritus abibit

E jecore: & plagas forsitan meminisse juvabit.

(cc) Venerat extremos jam tandem Hispanus ad Indos,
Orbem alium quaerens. Sed quom jam victa carinis
Cessissent matia, & palmas daret incola nudus,

Totaque victori tellus inventa pateret:

Praebibat longam, nugari certa, querelam

Bellua. Cognati nimirum gentibus illis,

Diffimilesque parum, vexabant hospitis aedes

Simioli; & densis miscebant omnia turmis,

Pejores mutilis cantoribus; (dd) & parasitiis.

Quid fieret? Nugas & ludicra ferrēt Iberus?

Sed non ad caedem visum est saevire. Quid ergo?

Quom primum incauti redeunt, & nota revisunt

Tecta, rapit velox & inobservatus ibidem


Ignivomam cannam, vasto quae gutture nimbum


Spar-

(cc) Fabella ex vero simili conficta ad rem praesentem.

(dd) Hyperbole.

Spargere sulphureum didicit, globulosque minutos,
 Foeta intus: laxatque rotam. Tremefacta repente
 Fulmine turba levis, liquidique adspersine plumbi
 Mille locis terebrata cutim, fugit ocyor curis;
 Et sua praecipiti repetit nemora avia saltu,
 Ales facta metu. Moestis cum matribus illic
 Ringantur multum; properantque subinde rubentes
 Scalpere cluniculas. Sed, ubi nil vociferando
 Profecisse vident, facto jam fine quiescunt
 Inter se: & memores hominum commercia vitant,
 Ingenium mutantque ferae, TERRORE MAGISTRO.





SERMO SEXTUS.

Solus uti soleo, nisi quod me passibus aequis
Mille sequebantur mea per vestigia curae,
Ibam trans Tiberim, Roma fruiturus ab alto
Vertice Janiculi (a), caelumque haustus apertum.
Cum meus occurrit mihi Faustulus; & procul: Ecquid,
Si jucunda fero, laetus si nuncius adsum,
Non solves aliquid? Solvam, ni me improbe ludis
More tuo, nam quid misero jam linquitur? Atqui
Cursor, Apollinea nuper qui venit ab aula,
Barrhasiae tulit optatissima gaudia publi,
Quae te audita juvent. Quae vero gaudia sodes?
Fare age. Quin, ait, ascendamus, & omnia disces.
Dum gradimur, propere soleas agitabat anhelus
A tergo Eurindus (b), tam fertile pectus honesti,
Quam gratum Musis: subitoque superveniens, se
Adjungit lateri. Post hunc Myraeus acutum

Excreat

(a) Id nomen editiori colli, qui totam despectat urbem.

(b) Faustulus, Eurindus, Myraeus, tres Arcadiae Pastores amici auctoris, sed perinde ac ipse auctor sub fictis nominibus occultati.

Excreat: admoniti subsistimus, & comes alter
 Additur, exemplum linguae sine labe fluentis.
 Auctus erat Capituli numerus, verum tamen una
 Mens erat. Officii paucissima verba. Subimus
 In sublime iugi, & circo confidimus amplo,
 Spumæa (c) mariporeo ludunt ubi flumina labro,
 Pensilibus deducta viis a fonte remoto.

Tum prior, arridens blande mihi, Faustus inquit.
 Sæctane o magno (d) non inficiande Parenti,
 Maeste animo: Accepta si clade, ferociter arma
 Rursum, & bella parat mendax & adultera virtus;
 Pars hominum melior tibi militat, & tibi multum
 Debet. Ab Etrusca (e) nil jam tibi faece timendum,
 Intolumem quem jurâ volunt, quem causa tuetur,
 Protegit & quicumque oculos non perdidit ambos,
 Ipsaque terribili defendit Gorgone Pallas.
 Quid age: nec magni posthac suffragia Phoebi
 Optabis; litem medius namque ipse diremit,

Amplius

(c) Fons est in Funiculo summo magnifici, & præclari operis, mira aquae copia, eaque longissimo emissario derivata.

(d) Id ideo dictum, quia Q. Sæctani filium noster Poëta se nominat.

(e) Faecem Etruscam vocat paucos infimæ sortis Florentinos, qui contra superiores sermones vehementius debacchati sunt.

Amplius instandi sublato jure. Itane, inquam,
 Vicimus? Horrendique (f) rota, & grunnitibus hostes!
 Nil potuere? Nihil; nec flectunt talia Divos,
 Ille refert: Verum quo res evaserit, audi.

Stigmata quae tulerit duro Cefellius ore,
 Montanos Lituos (g) cum Pimplae ad flumina vexit;
 Utque illo dicente, novem obriguere sorores,
 Et manibus clufere aures, obscœna vomentem
 Indociles ferre: Hinc satyros clamore vocatos,
 Plenum ignominiae, & multa vibice tumentem
 Exegisse procul; Res est incognita nulli,
 Cantaturque palam, & Thuscis servatur in actis.

Si pateris, Myraeus ait, duo verba. Profundas
 Nuper ad Eumenides Cefellius ivit (h). Ain tu?
 Sic est; & Medico lituos ex asse reliquit,
 Mortis legitimæ pretium. Nam livida terga,
 Ossaque contusa, & vestigia caetera fustis

Ex.

(f) Solemne id Porcis irritatis, ut in orbem se agglomerent, & medium accipiant, quem volunt dilaniare.

(g) Obscœnissimo carmini, quod contra Sermones edidit Cefellius, hic erat praefixus titulus I Pifferi di Montagna.

(h) Nam Cefellium acerbo sublato funere affirmabat auctor Menippeae, de qua infra: Idque fortasse, ne in illum, tanquam auctorem famosi libelli, legibus ageretur.

Excusare volens; dirum per corpora fluxum
 Causabatur, & articulos humore dolentes
 Aridus: Ast illi sua sic mendacia tandem
 Permagno steterunt: fingentem talia quippe,
 Incisa vena, & validi medicamine succi,
 Credulus occidit Medicus, nocuitque medendo.
 Ah! miseror: male falsus ad haec Eurindus, & ore
 Tertius: Oh factum male, quod non exitus illum
 Qui decuit, tulit, & meliori funere dignum
 Carnifici eripuit Medicus! Ne talia, quaeso,
 Faustulus increpitat. Qui cassum lumine vitae
 Versiculatorem foedum vulgavit (i), inepta
 Saepe & vana refert, semper contraria vero.
 Quidquid id est, faciem pugnorum grandine fractam,
 Tergaque verberibus saturata a monte tulisse,
 Id non ambiguum est: Illum & videre carentem
 Dentibus, & vitta cingentem sinciput alba
 Pastores Arni. Verum, ut quemcunque dolentem
 Oblectat socius, divisaque poena levatur;
 Dissimulat probrum catus, atque alia omnia fingit,
 Si forte inveniat fatuum, qui Numinis aulam,
 Tantundem ut referat, velit accusator adire.

Cur

(i) Ostendit Poëta, se nequaquam credere, quod de Cestellii morte vulgatum fuerat.

Cur non? Se magnis auditum plaufibus illic,
Se multa donatum hedera, laetisque remiffum
Auguriis; nil non fperandum Iudice Phoebo.

Quid moror? Artificis fraude, & sermonibus uncis
Graeculus abripitur, quo non petulantior alter,
Nomine Thymoleon. Quale hoc mi Faufule monftrum
Thymoleon? nomen terrendis matribus aptum,
Et natum lamiis facra inter murmura dici
Horrefco: Et vereor ne prima in carmine peccet
Syllaba (k). Quid refert? ego Thymoleon ta tacebo
Propterea? Ergo Thymoleon (veniam date verbo)
Grandia facundae laturus praemia linguae,
Alta petit Pindi, glabroque a Numine poſcit
Audiri. Genius, facrae custodia Cirrhae
Cui data, Tyrrhenis de finibus irrequietum
Adventaffe monet Rabulam, cui plurima contra
Seftanum. Anne iterum Cefellius? inquit Apollo:
Huc Satyri, huc adſint propere cum fuſtibus: Eia
Arcete hinc caput inviſum. Sed Thymoleon tis
Nomen ubi auditum; quod, ait, genus hoc bipedis? quo
Ore? quibus pannis? Fuſco ore (l), & corpore ficco,

Quale

(k) Prima in Thymoleon forte brevis eſt, ſed producitur hic neceſſitate metri.

(l) Scires vel ex hac deſcriptione, non laſuiſſe Seftano,
quis

Quale decet , quem dira fames , scabiesque , pedesque
 Certatim absumunt : Laceris male fultus alutis ,
 Ispidus , & foetens , miseri speciem exhibet Iri :
 Erecto tamen it collo : Petulantia buccis
 Eminent , & rabies , & major paupere fastus.
 Permite accedat . Meliori montis in herba
 Imberbis Judex aurato rite sedebat
 Innixus plectro : Per eburnea colla humerosque
 Purpureae ludunt vittae , crispataque leni
 Caesaries Zephro , quam roscida laurus obumbrat ,
 Molle fuit dorso . Succinctae hinc inde sorores
 Affidunt : Cithara haec gaudet , lituo illa nitenti ,
 Altera arundinibus , quarum est concordia discors :
 Omnes virgineum spirant & amabile quiddam ,
 Unde loco decus , & sancti velut aura pudoris.
 Ad latera assurgens viridanti sylvula myrto
 Halat odoratas animas , hederaeque sequaces
 Implicitae lauris , nulla quas educat arte
 Mite solum , pulchrae referunt spectacula scenae ,
 Qualia Telegoni colles , vel Tuscula Tempe ,
 Sed sincera magis , nullo violataque luxu .

Huc

*quis esset verus Thymoleon. Et notabile , quod nihilominus per-
 percerit ejus nomini.*

Huc dum Thymoleon subit, & se cominus offert,
 Horrifico aspectu visae expallesce Divae,
 Turbarique : Ut cum volucres videre pusillae
 Bubonem informem, Trepidis consistere jussis,
 Delius his illum dictis prior occupat. Heus tu,
 O quicumque venis Musarum incognite regno,
 Nec mihi vise prius (m), nisi forte Amphrysia quando
 Pascua servabam lactus de Numine Pastor;
 Tunc etenim multos hircos vidisse recordor:
 Quem mihi Sætanum finges? quidve oggeris? ad rem
 Nil equidem expecto. Nam quis nisi luscus ab ira
 Accuset Vatem, qui non sine Numine nostro
 Doctrinam asseruit veterem, fucoque carentem,
 Disjecitque dolos, quos pridem invexerat ardens
 Multorum ambitio, & facili socordia gaudens?
 Num non ingenue scripsit, studioque juvandi,
 Qui Rullos ideo (n), Cithisosque effinxit, inanes,
 Et sine re voces, ne corpora viva feriret,

Et

(m) Respexit ad notissimam fabulam, qua Apollo dicitur olim Admeti Regis armenta pavisse prope Amphrysum in Thessalia.

(n) Neminem viventium suo designavit nomine L. Sætanus. Sed ne aërem verberare videretur, Personas induxit commentitias, & fictas, vocibus adhibitis, ut ipse ait, inanibus, quibus scilicet nullus mortalium continetur.

Et timide morbum , salvis compescuit aegris ?
 Si nihil est quod te pungat , cur stulte laboras ?
 Sin tu Rullus es , aut Cithisus : praebere monenti
 Debueras aurem , & colaphos laudare salubres.
 Cur defendere delictum , quam vertere mavis ?
 Verum age : qualiacumque feres , praestabimus aures
 Scilicet , & Phoebum non experieris iniquum.

Thymoleon contra , rugis nil territus illis ,
 Durius os incude gerens , solidoque adamante :
 Improba Gens , inquit (o) , Patrem quae jactat Iberum ,
 Et pullo ad talos circumvestitur amictu ,
 Improba , & est inimica bonis , scelerata , nocensque ,
 Digna cruce , exitium terrarum , & dedecus aevi.
 Odi ego portenta haec , fanaque opibusque vigere ,
 Perque aulas grassari omnes , floremque Juventae
 Legibus informare suis late omnibus oris ;
 Valdius id me discruciat , quam fascia ruptum
 Ventriculum cingens , atque intestina coërcens.
 Nulla fides illis , nulla est reverentia legum :
 Amentes , indocti omnes , scelerumque magistri ,
 Depravatores morum , stolidique , asinique ,

Furci-

(o) Quae hic subjiciuntur , petita sunt ab ipsa Menippea ,
 quod carmen totum est contra Jesuitas. Ea porro L. Sestianus
 idcirco commemorat , ut appareat quam inepte responsum sit ad
 ejus Sermones.

Furciferique, ultraque hominum commercia, si fas,
 Avverruncandi. Quorsum haec? secum inquit Apollo,
 Attollitque simul scapulas, & contrahit ora,
 Attonito similis. Nulla est tam noxia pestis.
 Thymoleon pergit. Nam quod feralis sine ipsis
 Flagitium? Quae seditio? quae tristitia belli
 Semina, non instante tubam Tibicine nigro?
 Nil mirum est igitur, si Gens abstemia tales
 Summovet exilio (p), Odrysiis & finibus arcet,
 Non secus ac porcos. Sed quae jam natio non hos
 Devovet? aut quis non magis angues diligit? Ipsi
 Portenta haec hominum execrantur Japones, ex quo
 Sub pedibus posuere crucem, (q) sanctamque jubetur
 Calcare effigiem veniens a Gadibus hospes.

Interpellandi locus hic fuit. O bone: quo te
 Praecipitem malus ardor agit? quae somnia narras?
 Quo diversus abis? Magnus te livor adurit,
 Ut video: At nostrum quo tandem crimine Vatem
 Accusas? Age: dic aliquid, si tanta libido,
 Contra Sestianum: Namque id res postulat unum,

Unum

(p) Jesuitis crimini vertit Thymoleon, quod Turcae, quod
 Japones illis apud se domicilium non permittant.

(q) Est in ipso limine Urbium Japonicarum effigies Christi,
 quam advenae Europaei pedibus proculcare jubentur.

Unum id tempus agi. Sic Dellus. At temulentus
 Progređiens porro, & quo coeperat impete pergens:
 Pulchre Arnaldus (r), ait, pulchre Paschalius illos
 Exagitant libris aeternum in nomen ituris,
 Castigantque artes, & dignos vindice mores,
 Nec finem Blatero facies? Auctoribus illis
 Occidit ante diem Turnonius (s), impietasque,
 Atque superstitio terris insedit Eols,
 Psittacus unde loquax, & pictae copia testae,
 Cornicarıs adhuc? Crabronum murmure victus
 Maximus Albanus, (t) cerebrosum Pontificali
 Fulmine disjecit Sectam, caeloque ferentes
 Praelia Titanas fregit, civilibus unde
 Turbinibus patefacta via, Irretire juventam
 Qualicumque modo: Obsequiis fallacibus orbos

Prae-

(r) *Damnatos istorum libros multum laudat Thymoleon, eosque jam aureos, jam utilissimos aperte vocat.*

(s) *Quaecumque de Cardinalis Turnonii obitu, de Confucio, & aliis Sinicis rebus olim contra Jesuitas vulgata sunt, ea Thymoleon simul congerit in causa Sermonum, & L. Sectanti, ad quem minime pertinent.*

(t) *En ipsa Thymoleonis verba: Jesuitae in causa sunt, ut Clemens XI. Constitutionem Unigenitus edat, & lacryma- biles motus in Ecclesia Gallicana excitentur. Vide quale criminationis genus istud sit.*

Praedari vetulos, tabulasque vorare supremas,
 Fallere, graecari, pietatem fingere collo,
 Furari, atque ipsos in foenore ponere Divos,
 Hoc primum didicere Patres. Pejora volebat
 Dicere, & illa pudica parum: sed talia bucco
 Jussus habere sibi, & stomacho servare capaci,
 Scilicet effrontem jam dudum passus, & extra
 Propositum errantem, collecta turgidus ira
 Non tulit ulterius maledicere Divus Apollo:
 Inque pedes surgens, ut plectrum forte gerebat,
 Impulit, & misero vocem interclusit hianti.
 Ille quidem ocyus avertens, tergo excipit ictum,
 Prosiluitque fuga: At non se tenere Camoenae,
 Quin subito arrectae crepidas jacerent fugientis
 In caput, & costas, & palma utraque sonarent.
 Ut si quando amens media saltare suburra (u)
 Incipit, aut clunes populo monstrare coruscas,
 Romani pueri longis clamoribus illum
 Exagitant, thyrsique volant, & putrida mala,
 Complosaeque manus fugientem, & sibila tradunt.
 Vix elapsus erat, placido cum Cinthius ore
 Affatur socias. Nulli est, reor, abdita vestrum
 Lis nutu dirimenda meo. Fit Lucius ausi

Sa-

(u) *Vicus est urbis Romae despiciatissimus.*

Sacrilegi reus, in fraudes quod strinxit acutum
 Auspice me calamum, & mordaci asperfit aceto
 Quotquot inane gerunt nomen virtutis, & umbram,
 Maxima quae turba est hodie, Parnassia jamque
 Advenere jura Etrusco de litore bini (v)
 Accusatores. Audistis qualia coram
 Attulerint: vestras temeraverat ille tacendis
 Propudiis aures, maledictis perculit alter,
 Ambo extra rem. Loyolae generosa propago
 Peccat multa: Quid hoc Sectani ad carmina? quippe
 Istud agit falsos cum verberat ille disertos,
 Sint ne alii fontes, an sint sine crimine. Causae
 Argumenta malae convicia: Nec melior qui
 Transgrediens causam, fertur per devia. Quid jam
 Tam facile, ac Asinum quemquam indoctumque vocare,
 Latronem, fatuum, scelerosum, & caetera? Sed cui
 Inconcussa manet ratio, & facundia vivax,
 Abstinet his animi quae produnt ulcera laesi.
 Semper & invalidi censentur militis arma,
 Ergo dissidii & rixarum si quid ego, & vos
 Possumus, haec esto finis (w), Sileatur utrinque

Post

(v) *Cesellius primo, & nunc iterum Thymoleon.*

(w) *Judicium Apollinis de L. Sectano, ejusque Accusatoribus.*

Post haec. Sit felix, & parva laude fruatur
 Sæctanus, spernatque hebetis deliria vulgi,
 Laetus forte sua. At foedus Cetellius, atque
 Thymoleon furiosus, ab hinc ad saecula centum
 Infames sunt, nullique leguntur honesto.
 Conticuit Phoebus, laetae plausere sorores,
 Scriptaque confestim viridi sententia libro,
 Ad nemus Arcadicum celeri curfore volavit.

Faustule, credendum est, hac cognitione peracta,
 Vertendam rerum faciem? Sperabimus ex hoc
 Possè verecundum fieri, aut demittere possè
 Thymoleonta aures, & vultum sumere victi?
 Nil minus, ille refert; fortasse & nunc sibi plaudit
 Improbis, aut certe plaudit Cetellius illi;
 Idque satis fatuo, ut mente obdurer eadem
 Corneus, in faciem pedens hominumque Deumque.
 Quis porro abjiciat, quem non turpissima rerum
 Pauperies? (x) Natus foetas ubi villica Mater
 Mulgebat vaccas, nucibus, madidoque lupino
 Vomeris in spem crescebat puer. Inde revulsum
 Magna parens Vatum, & studiorum sedula nutrix

Ex.

(x) Si haec vera sunt, erravit Leo Pasculus, ubi scriptorem illum navicularii filium appellat, ac deinde militem, postremo transfugam fuisse affirmat.

Except, velut ignavum Florentia Fucum
 Laetas inter Apes, pulchro quae examine circum
 Pervolitant flores, & mellis dona laborant,
 Post ubi litterulas quotuor conamine multo
 Condidicit, patrium jam dedignatus agellum,
 Assumpsit pro falce togam, Paedotriba factus,
 Centuriasque docet Puerorum inflectere Musam,
 Inde animam servat; suspiria multa daturus,
 Menstrua si cesset merces, primisque Calendis
 Sportula discipuli totum non afferat assem,
 Et tamen hic panem docilis mordere caninum,
 Potandam praebet cui sicca cucurbita vappam,
 Concilium late metuendum (γ) provocat, & quod
 Infensum nolle, censu qui gaudet equestri,
 Filius hic terrae tam multis millibus ultro
 Bella movet, demens! bilemque ciere laborat
 Incassum, spernente levem Jovis alite muscam,
 Quid speres post haec? Calybem mollescere cernes,
 Comminui silices, annosaeque robora flecti;
 Non tamen hic portentifica de fronte remittet,
 Integer effracto nutet si cardine Mundus.
 Nescis, heu nescis, quali sit Graeculus ore.

Omnia

(γ) *Jesuitas intellige, quos ille prior lacessivit scriptis maledicentissimis.*

Omnia cum peretunt illi, jam morte propinqua,
 Ultima discedit petulantia: si modo probris
 Momento abstineat, gelidum dic esse cadaver.
 Oh utinam tales Nursina novacula tandem
 Eviret, & barbam mento, lumbisque vigorem
 Invideat! caderent animi, & migraret hiulco
 De jecore urtica, aut ego fallor. Nullus avitæ
 Stultitiæ saltem superesset filius haeres,
 Nec patrii mores extincto Patre redirent.
 Nam fuit (z) hoc vitium cum sanguine, progeniemque
 Inficit, & quartos descendit ad usque nepotes.

Ille quidem sua nunc agnoscit damna, doletque
 Interne, & sentit fervens sub pectore crimen:
 Sed quamquam trepidus corde, & formidine multa
 Lubricus, invictæ profitetur marmore frontis
 Grandem animum, pergitque audax, & magna minatur
 Voce, supercilio. Quid vero postea? Phoebi
 Jussa valent. Infame caput iam quisque cavebit
 Ingenuus, veluti populo quem pustula sano
 Segregat, & suspecta lues facit esse timendum,

Rum-

(z) *Plus nimio berce verum est, aliquos pro Litteratis
 se gerere, non alio suo merito, quam quod ex Parenti-
 bus opinione vulgi litteratis orti sunt, & quasi jure suc-
 cessionis.*

Rumpeturque ira, simulans laeta omnia vultu.

Recte, inquam: Tamen infantes truculenta momordit
Bellua, vexavitque odiis, & carmine diro.

Heu! piget hunc illis a me fluxisse laborem,

Causa utcumque data. Oh demens, graviore reponit

Faustulus eloquio. Talem movisse tumultum

Si tibi verratur fraudi, culpae licebit

Suggestus omnes, Praeconesque inde tonantes

In vitia, & mores aevi, si forte homuli tres

Offendi inde velint, & conjuratio fiat.

Sed mitte hanc curam. Vilis dicteria Nattae

Magnanimos Heroas, & altae conscia laudis

Pectora non tangunt, somnos faciuntve minores.

Talibus infuerunt jam tum, cum missus ad Indos

Phosphorus Indorum (aa). Pauci non pauca tulerunt:

Vexati crevere tamen: labor improbus illis

Nutrimenta dedit; per & adversantia mille

Terrarumque, Erebiq;ue pericula velificati,

Ingentem implerunt fama, & virtutibus orbem.

An vero nova sunt, & avis incognita nostris,

Quae modo Thymoleon recoquit? Cana omnia plusquam

Diphtera

(aa) Jam inde scilicet a tempore S. Francisci Xaverii,
quem Indorum Phosphorum merito vocat Poëta, quia primus in
eas terras Fidei lumen invexit.

Diphtera (bb), rancidalis & compilata libellis.
 Non nocuere prius bene culta venustaque: Cur nunc
 Plena Soloecismis (cc), & nullo scripta lepore?
 Postremo, ut laudes, nisi sit laudabilis auctor,
 Fruge vacant; ita sunt fatuorum tela sine ictu,
 Et nulli nocitura volant. Ego Thymoleontis,
 Dum sapiam, Satyras minus & maledicta cavebo,
 Quam laudes. Aliqua à est laudatore scelesto
 Suspicio sceleris. Similes Catilina Cethegos
 Laudabat, nunquam Curios peccare timentes.
 Garriat ergo licet fatuorum jure: Quis illi
 Hoc jus invidetur? modo foeda, & inania circum
 Scommata portantem, quibus ulla est portio cordis,
 Praetereant, solique velint audire Lanistae,
 Aut Lixae, aut Verpi, aut positis jam Mulio cistis.
 Nec plus te moveant baulantis jurgia, quam cum
 Clamitat in trivio (dd) querulis qui prandia vendit

Feli-

(bb) Diphtera pellis fuit ejus Caprae, quae Jovem lactavit.
 In ea creditum est antiquissimas res fuisse ab eo scriptas, unde
 proverbio locus.

(cc) Re ipsa frequentes occurrunt errores in Menippea, iique
 admodum crassi, quos notatos vide apud Leonem Pasculum.

(dd) Sunt Romæ qui carnes equinas cum incondito clamore
 circumferunt, ad alendos feles.

Felibus, uda ferens dissecti omenta Caballi.

His me ille erectum dictis advertere iussit
Humida sublustris manare crepuscula caelo,
Pileolum monstrans tacitis sudoribus udum.
Ergo digredimur pariter, totamque remensi
Ad pontem usque viam, divellimur. Atque ego paulum
Progressus, mercedem, inquam, pro nuntio habebis
Faustule: Cras ad me comites si adduxeris istos,
Spumantem vobis Carracam (ee), & crustula ponam,
Et multa inter nos labro nigricante feremus.

(ee) *Cacavum, ex quo fit Cocolate, optimum putant, quod
ex Carraca insula debetur.*





